

প্রভাত সঙ্গীত।

শ্রী রবীন্দ্রনাথ ঠাকুর

প্রণীত।

কলিকাতা।

আদি ব্রাহ্মবরাজ যন্ত্রে

শ্রীকালিদাস চক্রবর্তী দ্বারা

মুদ্রিত ও প্রকাশিত।

✓


৫৪৫২/৬১

বৈশাখ ১৮০৫ শক।

১৯২০

১৪৪৩

১৭-৭-১৯২০



R-107-
RN MITRA

NOT TO BE LENT OUT
SHELF LISTED

B
.891.441
T479.12

সূচিপত্র।

বিষয়	পৃষ্ঠা
প্রভাত বিহঙ্গের গান (আহ্বান সঙ্গীত) ...	১০
নির্বাকের স্বপ্নভঙ্গ	১
অভিমানিনী নির্বাকিণী	১৫
প্রভাত উৎসব	২৩
অনন্ত জীবন	২৮
অনন্ত মরণ	৩৭
পুনর্জন্ম	৪৬
প্রতিধ্বনি	৫৫
মহাস্বপ্ন	৬৩
হৃষ্টস্থিতি প্রলয়	৬৬
কবি (অনুবাদিত)	৮১
বিসর্জন (ঐ)	৮৩
জাঁখি ও তারা (ঐ)	৮৪
হৃদয় ও ফুল (ঐ)	৮৫
সংশ্লিষ্ট (ঐ)	৮৬
স্রোত	৯০
✓ শরতে প্রকৃতি	৯৫
চেয়ে থাক	১০০
✓ শীত	১০৫
সাধ	১১১
সমাপন	১১৮

অশুদ্ধি শোধন।

অশুদ্ধি	পৃষ্ঠা	পাঠ্য	শুদ্ধ
মুদ্র	২৮	১৬	মুদ্র
মাসে	৪০	৩	মাসে

বিজ্ঞাপন ।

প্রভাত-সঙ্গীত প্রকাশিত হইল। “অভিমানিনী নির্বরিণী” নামক কবিতাটি আমার লিখিত নহে। “নির্বর-
রের স্বপ্ন-ভঙ্গ” রচিত হইলে পর আমার কোন শ্রদ্ধেয় বন্ধু
তাহারই প্রসঙ্গ ক্রমে “অভিমানিনী নির্বরিণী” রচনা করেন।
উভয় কবিতাই ভারতীতে একত্রে প্রকাশিত হইয়াছিল।
অতএব উভয়ের মধ্যে যে একটি আজন্ম-বন্ধন স্থাপিত হই-
য়াছে, তাহা বিচ্ছিন্ন না করিয়া দুটিকেই একত্রে রক্ষা
করিলাম।

“শরতে-প্রকৃতি,” “শীত,” ও গুটিকতক অনুবাদ ব্যতীত
প্রভাত সঙ্গীতের আর সমুদয় কবিতা গুলিই সম্ভ্রান্তি লিখিত
হইয়াছে।

গ্রন্থকার ।

Presented,
to His

Sharendra Nath Mitra
Sreekrishnafoord

by S. H. Mitter
Rajaramfoord,

স্নেহ উপহার।

শ্রীমতী ইন্দিরা—

প্রাণাধিকার।

বাবলা।

আয়রে বাছা কোলে বসে চা' মোর মুখ পানে,
হাসি-খুসী প্রাণ খানি তোর প্রভাত ডেকে আনে।
আমায় দেখে আসিস্ ছুটে, আমার বাসিস্ ভালো,
কোথা হ'তে পড়লি প্রাণে তুইরে উষার আলো!

দেখরে, প্রাণে, মেহের মত, শাদা শাদা জুঁই ফুটেছে।
দেখরে, আমার গানের সাথে ফুলের গন্ধ জড়িয়ে গেছে।
গেঁথেছিরে গানের মালা, ভোরের বেলা বনে এসে
মনে বড় সাধ হয়েছে পরাব তোর এলোকেশে।
গানের সাথে ফুলের সাথে মুখখানি মানাবে ভাল,
আয়রে তবে আয়রে মেয়ে দেখরে চেয়ে রাত পোহালো!
কচি মুগটি ধিরে দেব ললিত রাগিণী দিয়ে,
বাপের কাছে মায়ের কাছে দেখিরে আস্‌বি ছুটে গিয়ে।

চাঁদনি রাতে বেড়াই হাতে মুখ খানি তোর মনে পড়ে,
তোর কথাটাই কিলিবিলা মনের মধ্যে নড়ে চড়ে।

হাসি হাসি মুখখানি তোর ভেসে ভেসে বেড়ায় কাছে,
 হাসি যেন এগিয়ে এল, মুখটি যেন পিছিয়ে আছে !
 কচি প্রাণের আনন্দ তোর, ভাঙা বৃকে দে ছড়িয়ে,
 ছোট ছোট হাত দিয়ে তোর, গলাটি মোর খন্ড ছড়িয়ে !
 বিজন প্রাণের দ্বারে বসে করবিরে তুই ছেলেখেলা,
 চূপ করে তাই বসে বসে দেখ'ব আমি সন্ধেবেলা ।
 কোথায় আছিস, সাড়া দেরে, বৃকের কাছে আররে তবে,
 তোর মুখেতে গানগুলি মোর কেমন শোনায় শুনতে হবে !
 আমি যেন দাঁড়িয়ে আছি একটা বাবুলা গাছের মত,
 বড় বড় কাঁটার ভয়ে তফাৎ থাকে লতা যত ।
 সকাল হলে মনোর সুখ ডালে ডালে ডাকে পাখী,
 (আমার) কাঁটা ডালে কেউ ডাকে না চূপ করে তাই দাঁড়িয়ে থাকি !
 নেইবা লতা এল কাছে, নেইবা পাখী বনল শাণে,
 যদি আমার বৃকের কাছে বাবুলা ফুলটি ফুটে থাকে !
 বাতাসেতে ফুলে ফুলে ছড়িয়ে দেয়রে মিষ্টি হাসি,
 কাঁটা-জগৎ ভুলে গিয়ে তাই দেখে হরষে ভাসি !
 দূর কর ছাই, কৌকের মাথায় বলে ফেল্লম কত কি যে ?
 কথা গুলো ঠেকচে যেন চোখের জলে ভিজ়ে ভিজ়ে !

রবি কাকা ।

প্রভাত বিহঙ্গের গান।

(আস্রান-মন্ত্রীত)

ওরে তুই জগৎ ফুলের কীট।
জগৎ যে তোর গুণ্ডায়ে আসিল,
মাটিতে পড়িল থ'সে,
সারা দিন রাত গুমরি গুমরি
কেবলি আছি ব'সে !
মড়কের কণা, নিজ হাতে তুই
রচিলি নিজের কারা,
আপনার জালে জড়িয়ে পড়িয়া
আপনি হইলি হারা।
অবশেষে কারে অভিশাপ দিস্
হাছতাশ ক'রে সারা,
কোণে ব'সে শুধু ফেলিস্ নিশাস,
ঢালিস্ বিষের ধারা।

জগৎ যে তোর মুদিয়া আসিল,
ফুটিতে নারিল আর,

প্রভাত হইলে প্রাণের মাঝারে
 ঝরে না শিশির ধার !
 জড়িত কুণ্ডিত বলিত হৃদয়ে
 পশে না রবির কর,
 নয়নে তাহার আলোক সহেনা
 জোছনা দেখিলে ভর !
 কালো কীট ওরে, শুধু তোরে নিয়ে
 মরণ পুষিছে প্রাণে,
 অশ্রুক্ষণা তোর জ্বলিতেছে তার
 মরমের মাঝখানে,
 ফেলিস্ নিশাস, মরুর বাতাস,
 জ্বলিস্ জ্বালাস কত,
 আপন জগতে আপনি আছিস্
 একটি রোগের মত !
 হৃদয়ের ভার বহিতে পারে না,
 আছে মাথা নত কোরে,
 ফুটিবেনা ফুল, ফলিবেনা ফল,
 শুকায় পড়িবে ম'রে !
 তুই শুধু সদা কাঁদিতে থাকিবি
 মৃত জগতের মাঝে,

আঁধারের কোণে ঘুরিয়া বেড়াবি

কি জানি কিসের কাজে !

আঁধার লইয়া, ছতাস লইয়া

আপনে আপনি মিশে,

জ্বরজ্বর হ'য়ে মরিয়া রহিবি

নিজের নিশাস বিধে ।

বাহিরে গাহিবে মরণের গান

শুকান' পল্লব গুলি,

জগতের সাথে ভুতলে পড়িয়া

ধুলিতে হইবি ধুলি ।

রোদন, রোদন, কেবলি রোদন,

কেবলি বিষাদ স্বাস,

লুকায়ে, শুকায়ে, শরীর গুটায়

কেবলি কোটরে বাস ।

মাথা অবনত, আঁখি জ্যোতিহীন,

শরীর পড়েছে নুয়ে,

জীর্ণ শীর্ণ তমু ধুলিতে মাথান

অলস পড়িয়া ভুঁয়ে ।

নাই কোন কাজ, — মাঝে মাঝে চান্স
মলিন আপনা পানে,
আপনার স্নেহে কাতর বচন
কহিস্ আপন কানে ।
দিবস রঞ্জনী মরীচিকা-স্মরা
কেবলি করিস পান ।
বাড়িতেছে তৃষা—বিকারের তৃষা
ছটফট করে প্রাণ ।
দাও দাও ব'লে সকলি যে চান্স,
জঠর জ্বলিছে ভূখে !
মুঠি মুঠি ধূলা তুলিয়া লইয়া
কেবলি পূরিস্ মুখে !
নিজের নিখাসে কুয়াশা ঘনায়
ঢেকেছে নিজের কায়া,
পথ আঁধারিয়া পড়েছে সমুখে
নিজের দেহের ছায়া !
ছায়ার মাঝারে দেখিতে না পাও,
শব্দ গুনিলে ভর'—
বাহু পসারিয়া চলিতে চলিতে
নিজেরে আঁকড়ি ধর' ।

মুখেতে রেখেছে আঁধার গুঁজিয়া,

নয়নে জ্বলিছে রিষ,

সাপের মতন কুটিল হাসিটি,

দশনে তাহার বিষ ।

চারিদিকে শুধু ক্ষুধা ছড়াইছে,

যে দিকে পড়িছে দিঠ,

বিষেতে ভরিলি জগৎ, রে তুই

কীটের অধম কীট !

আজিকে বারেক ভ্রমরের মত

বাহির হইয়া আয়,

এমন প্রভাতে এমন কুসুম

কেনরে গুকায়ে যায় !

বাহিরে আনিয়া উপরে বসিয়া

কেবলি গাহিবি গান,

তবে সে কুসুম কহিবে কথা,

তবে সে খুলিবে প্রাণ !

অতি ধীরে ধীরে ফুটিবে দল,

বিকশিত হয়ে উঠিবে হাস,

অতি ধীরে ধীরে উঠিবে আকাশে
লঘু পাখা মেলি খেলিবে বাতানে
হৃদয়-খুলানো, আপনা-ভুলানো,
পরান-মাতান' বাস।

পাগল হইয়া মাতাল হইয়া
কেবলি ধরিবি রহিয়া রহিয়া

গুন গুন গুন তান !

প্রভাতে গাহিবি, প্রদোষে গাহিবি,
নিশীথে গাহিবি গান !

দেখিয়া ফুলের নগন মাধুরী,

কাছে কাছে শুধু বেড়াইবি ঘুরি,

দিবা নিশি শুধু বেড়াইবি ঘুরি,

দিবানিশি শুধু গাহিবি গান !

থর থর করি কাঁপিবে পাখা

কোমল কুম্মর রেণুতে মাখা,

আবেগের ভরে ছলিয়া ছলিয়া

থর থর করি কাঁপিবে প্রাণ !

কেবলি উড়িবি, কেবলি বসিবি

কভুবা মরম মাঝারে পশিবি,

আকুল-নয়নে কেবলি চাহিবি
কেবলি গাহিবি গান !
স্বরগ-স্বপন দেখিবি কেবল
করিবিরে মধু পান ।

আকাশে হাসিবে তরুণ তপন,
কাননে ছুটিবে বার,
চারিদিকে তোর প্রাণের লহরী
উথলি উথলি যায় ।

বায়ুর হিল্লোলে ধরিবে পল্লব,
মর মর মৃদু তান,
চারিদিক হতে কিনের উল্লাসে
পাখীতে গাহিবে গান ।

নদীতে উঠিবে শত শত ঢেউ,
গারে তারা কল কল,
আকাশে আকাশে উথলিবে শুধু
হরষের কোলাহল !

কোথাও বা হাসি, কোথাও বা খেলা,
কোথাও বা স্তম্ভ গান,
মাঝে বসে তুই বিভোর হইয়া,
আকুল পরাণে নয়ান মুদ্রিয়া

অচেতন স্রুথে চেতনা হারিয়ে

করিবিরে মধুপান ।

দূর হতে কানে পাশিবে গান,

দূর হতে কাছে আসিবে বাস,

দূর হতে বায়ু অলসে এলায়ে

কাছে আসি ধীরে ফেলিবে শ্বাস !

প্রভাত বাতাস প্রভাত তপন

চারিদিকে তোর গাঁথিবে স্বপন,

গভীর স্বপন-সাগরে ডুবিয়া

করিবিরে মধুপান,

ভুলে যাবি ওরে আপনারে তুই

ভুলে যাবি তোর গান ।

মোহ লাগিবেরে নয়নেতে তোর,

যে দিকে চাহিবি হয়ে যাবি ভোর,

যাহারে হেরিবি, তাহারে হেরিয়া

মজিয়া রহিবে প্রাণ ।

ঘুমের ঘোরতে গাহিবে পাখী

এখনো যে পাখী জাগেনি,

মহান্ আকাশ ধনিয়া ধনিয়া

উঠিবে বিভাস রাগিণী ।

স্বপন সমান পশিতেছে কানে

ভেদিয়া নিশীথ রাশি ;

উদাস জগত যেতে চায় সেথা

দেখিতে পেয়েছে পথ,

দিবস রজনী চলেছেরে তাই

পূরাইতে মনোরথ !

এ গান শুনিনি, এ আলো দেখিনি,

এ মধু করিনি পান,

এমন বাতাস পরাণ পূরিয়া

করেনিरे স্মৃধা দান,

এমন প্রভাত-কিরণ-মাঝারে

কখন করিনি স্নান,

বিফলে জগতে লভিনু জনম,

বিফলে কাটিল প্রাণ !

দেখরে সবাই চলেছে বাহিরে

সবাই চলিয়া যায়,

পথিকেরা সবে হাতে হাতে ধরি

শোন্রে কি গান গায় !

জগৎ ব্যাপিয়া, শোন্রে, সবাই

ডাকিতেছে, আয়, আয়,

জগত-অতীত আকাশ হইতে
 বাজিয়া উঠিবে বাঁশি,
 প্রাণের বাসনা আকুল হইয়া
 কোথায় যাইবে ভাসি ।
 উদাসিনী আশা গৃহ তেয়াগিয়া
 অসীম পথের পথিক হইয়া
 স্মদূর হইতে স্মদূরে উঠিয়া
 আকুল হইয়া চায়,
 জোছনা-বিভোর চকোরের গান,
 ভেদিয়া ভেদিয়া স্মদূর বিমান,
 চাঁদের চরণে মরিতে গিয়া
 মেঘেতে হারান্নে যায় ।
 মুদিত নয়ান, পরাণ বিতল
 স্তবধ হইয়া শুনিবি কেবল,
 জগতেরে সদা ডুবায় দিতেছে
 জগত-অতীত গান ;
 তাই শুনি যেন জাগিতে চাহিছে
 ঘুমেতে মগন প্রাণ ।
 জগত-বাহিরে যমুনা-পুলিনে
 কে যেন বাজায় বাঁশি,

কেহবা আগেতে কেহবা পিছায়ে,

কেহ ডাক শুনে ধায় ।

অসীম আকাশে, স্বাধীন পরাণে

প্রাণের আবেগে ছোটে,

এ শোভা দেখিলে জড়ের শরীরে

পরান নাচিয়া ওঠে ।

তুই শুধু ওরে ভিতরে বসিয়া

গুমরি মরিতে চাস !

তুই শুধু ওরে করিস রোদন

ফেলিস দুখের স্বাস !

ভূমিতে পড়িয়া, আঁধারে বসিয়া

আপনা লইয়া রত,

আপনারে সদা কোলেতে তুলিয়া

মোহাগ করিস কত !

আর কত দিন কাটিবে এমন

সময় যে চলে যায় ।

ওই শোন্ ওই ডাকিছে সবাই

বাহির হইয়া আর !

প্রভাত-সঙ্গীত।

নির্ব্বারের স্বপ্ন ভঙ্গ।

আজি এ প্রভাতে প্রভাত-বিহগ

কি গান গাইল রে।

অতি দূর—দূর আকাশ হইতে

ভাসিয়া আইল রে।

না জানি কেমনে পশিল হেথায়

পথহারা তার একটি তান,

আঁধার গুহায় ভ্রমিয়া ভ্রমিয়া,

গভীর গুহায় নামিয়া নামিয়া,

আকুল হইয়া কাঁদিয়া কাঁদিয়া,

ছুঁয়েছে আমার প্রাণ।

আজি এ প্রভাতে সহসা কেনরে

পথহারা রবি-কর

আলয় না পেয়ে পড়েছে আসিয়ে

আমার প্রাণের পর।

প্রভাত সঙ্গীত ।

বহুদিন পরে একটি কিরণ

গুহায় দিয়েছে দেখা,

প'ড়েছে আমার আঁধার সলিলে

একটি কনক রেখা ।

প্রাণের আবেগ রাখিতে নারি,

থর থর করি কাঁপিছে বারি,

টলমল জল করে থল থল,

কল কল করি ধরেছে তান ।

আজি এ প্রভাতে কি জানি কেনরে

জাগিয়া উঠেছে প্রাণ ।

জাগিয়া, দেখিনু চারিদিকে মোর

পাশাণে রচিত কারাগার ঘোর,

বুকের উপরে আঁধার বসিয়া

করিছে নিজের ধ্যান ।

না জানি কেনরে এত দিন পরে

জাগিয়া উঠেছে প্রাণ ।

জাগিয়া দেখিনু আমি আঁধারে রয়েছি আঁধা,

আপনারি মাঝে আমি আপনি র'য়েছি বাঁধা ।

র'য়েছি মগন হয়ে আপনারি কলস্বরে,

ফিরে আসে প্রতিধ্বনি নিজেরি শ্রবণ পরে ।

গভীর—গভীর গুহা, গভীর আঁধার ঘোর,

গভীর ঘুমন্ত প্রাণ

একেলা গাহিছে গান,

মিশিছে স্বপন-গীতি বিজন হৃদয়ে মোর !

দূর—দূর—দূর হ'তে ভেদিয়া আঁধার কারা,

মাঝে মাঝে দেখা দেয় একটি সন্ধ্যার তারা ।

ঘুমায়ে দেখিরে যেন স্বপনের মোহ মায়া,

পড়েছে প্রাণের মাঝে একটি হাসির ছায়া ।

তারি মুখ দেখে দেখে,

আঁধার হাসিতে শেখে,

তারি মুখ চেয়ে চেয়ে করে নিশি অবমান ;

শিহরি উঠে বারি, দোলে-দোলে-দোলে প্রাণ,

প্রাণের মাঝারে ভাসি,

দোলে-দোলে—দোলে-দোলে হাসি,

দোলে-দোলে প্রাণের পরে আশার স্বপন মম,

দোলে-দোলে তারার ছায়া স্নেহের আভাস মম !

প্রণয়-প্রতিমা যবে স্বপনে দেখে কবি,

অধীর স্নেহের ভরে

কাঁপে বুক থর থরে,

কম্পমান বক্ষ পরে দোলে সে মোহিনী ছবি ;
 দুখীর আঁধার প্রাণে অথের সংশয় যথা,
 তুলিয়া তুলিয়া সদা মৃদু মৃদু কহে কথা !

মৃদু ভয়, কভু মৃদু আশ,

মৃদু হাসি, কভু মৃদু শ্বাস ;

বহুদিন পরে শোনা বিস্মৃত গানের তান,
 দোলেরে প্রাণের মাঝে, দোলেরে আকুল প্রাণ,

আধ' আধ' জাগিছে স্বরণে,

পড়ে পড়ে, নাহি পড়ে মনে !

তেমনি তেমনি দোলে,

তারাটি আমার কোলে,

করতালি দিয়ে বারি কল কল গান গায়,
 দোলায়ে দোলায়ে যেন ঘুম পাড়াইতে চায় !

মাঝে মাঝে এক দিন, আকাশেতে নাই আলো,
 পড়িয়া মেঘের ছায়া কালো জল হয় কালো ।

আঁধার সলিল পরে

ঝর ঝর বারি ঝরে,

ঝর ঝর ঝর ঝর, দিবানিশি অবিরল,

বরষার দুখ কথা, বরষার আঁখি জল ।

গুরে গুরে আন মনে দিবানিশি তাই গুনি,
 একটি একটি ক'রে দিবানিশি তাই গুনি,
 তারি সাথে মিলাইয়ে কল কল গান গাই,
 ঝর ঝর কল কল দিন নাই, রাত নাই।
 ঝর ঝর কল কল গানেতে মিশিল গান,
 তালে তালে তানে তানে প্রাণেতে মিশিল প্রাণ !
 বরষা গুহায় পশি, স্বপ্ন আসনে বসি,
 কহিল আমার কাছে আমারি প্রাণের কথা ;
 বসিয়া হৃদয় মাঝে অঙ্গুষ্ঠাধি কবি যথা
 নিজের গানেতে গাহে পরের প্রাণের ব্যথা ।

এমনি নিজেরে ল'য়ে রয়েছি নিজের কাছে,
 আঁধার সলিল পরে আঁধার জাগিয়া আছে।
 এমনি নিজের কাছে খুলেছি নিজের প্রাণ,
 এমনি পরের কাছে শুনেছি নিজের গান ।

আজি এ প্রভাতে রবির কর
 কেমনে পশিল প্রাণের পর,
 কেমনে পশিল গুহার আঁধারে
 প্রভাত পাখীর গান ।

না জানি কেনরে এত দিন পরে
জাগিয়া উঠিল প্রাণ !
জাগিয়া উঠেছে প্রাণ,
(ওরে) উথলি উঠেছে বারি,
(ওরে) প্রাণের বাসনা প্রাণের আবেগ,
রুধিয়া রাখিতে নারি !

থর থর করি কাঁপিছে ভূধর,
শিলা রাশি রাশি পড়িছে থ'সে,
ফুলিয়া ফুলিয়া ফেনিল সলিল
গরজি উঠিছে দারুণ রোষে !
হেথায় হোথায় পাগলের প্রায়
ঘুরিয়া ঘুরিয়া মাতিয়া বেড়ায়,
বাহিরিতে চায়, দেখিতে না পায়
কোথায় কারার দ্বার !

প্রভাতে যেন লইতে কাড়িয়া,
আকাশে যেন ফেলিতে ছিঁড়িয়া
উঠে শূন্য পানে——পড়ে আছাড়িয়া
করে শেষে হাহাকার !

প্রাণের উল্লাসে ছুটিতে চায়,
ভূধরের হিয়া টুটিতে চায়,

আলিঙ্গন তরে উর্দ্ধে বাহু তুলি
 আকাশের পানে উঠিতে চায় ।
 প্রভাত-কিরণে পাগল হইয়া
 জগত মাঝারে লুটিতে চায় ।
 কেনরে বিধাতা পাষণ হেন,
 চারি দিকে তার বাঁধন কেন ?
 ভাস্করে হৃদয় ভাস্করে বাঁধন,
 সাধরে আজিকে প্রাণের সাধন,
 লহরীর পরে লহরী তুলিয়া
 আঘাতের পরে আঘাত কর ;
 মাতিয়া যখন উঠেছে পরাণ,
 কিসের আঁধার, কিসের পাষণ,
 উথলি যখন উঠেছে বাসনা,
 জগতে তখন কিসের ডর ।

এমনি আবেগে উঠিবি উথলি
 আকাশ যেনরে ছুঁইতে পাই,
 ওই মেঘে মেঘেকরে কানাকানি
 উষা-কুমারীর রাঙ্গা মুখখানি
 ওই দূর হতে পাইরে দেখিতে
 ওই মুখখানি চুমিতে চাই ।

সহসা আজি এ জগতের মুখ
 নূতন করিয়া দেখিনু কেন ?
 একটি পাখীর আধখানি তান
 জগতের গান গাহিল যেন ।
 জগত দেখিতে হইব বাহির,
 আজিকে করেছি মনে,
 দেখিবনা আর নিজেরি স্বপন
 বসিয়া গুহার কোণে ।
 আমি—চালিব কল্পণা-ধারা ।
 আমি—ভাঙ্গিব পাষণ-কারা,
 আমি—জগৎ প্লাবিয়া বেড়াব গাহিয়া
 আকুল পাগল পারা ।
 কেশ এলাইয়া, ফুল কুড়াইয়া,
 রামধনু-আঁকা পাখা উড়াইয়া,
 রবির কিরণে হাসি ছড়াইয়া,
 দিবরে পরাণ ঢালি ।
 শিখর হইতে শিখরে ছুটিব,
 ভূধর হইতে ভূধরে নুটিব,
 হেসে খল খল, গেরে কল কল,
 তালে তালে দিব তালি ।

তটিনী হইয়া যাইব বহিয়া—
 যাইব বহিয়া—যাইব বহিয়া—
 হৃদয়ের কথা কহিয়া কহিয়া,
 গাহিয়া গাহিয়া গান,
 যত দেব' প্রাণ ব'হে যাবে প্রাণ,
 ফুরাবে না আর প্রাণ !
 এত কথা আছে, এত গান আছে,
 এত প্রাণ আছে মোর,
 এত সুখ আছে, এত সাধ আছে,
 প্রাণ হয়ে আছে তোরা !

রবি শশি ভাঙি গাঁথিব হার,
 আকাশ আঁকিয়া পরিব বাস ।
 মাঝের আকাশে করে গলাগলি,
 অলংকার অলদ রাশ,
 অতিভূত হয়ে কনক-কিরণে
 রাখিতে পারেনা দেহের ভার ।
 যেনরে বিবল হয়েছ গোপুলি
 পূরবে আঁধার বেনী পড়ে ধুলি,

X/2

পশ্চিমেতে পড়ে খসিয়া খসিয়া

সোনার আঁচল তার।

মনে হবে যেন সোনা মেঘ গুলি

খসিয়া পড়েছে আমারি জলে,

সুদূরে আমারি চরণ-তলে।

আকুলি বিকুলি শত বাহু তুলি

যতই তাহারে ধরিতে যাব,

কিছুতেই তারে কাছে না পাব।

আকাশের তারা অবাক হবে,

সারাটি রজনী চাহিয়া র'বে

জলের তারার পানে।

না পাবে ভাবিয়া এল কোথা হতে,

নিজের ছায়ারে চাবে চুম খেতে

হেরিবে স্নেহের প্রাণে।

শ্যামল আমার দুইটি কুল,

মাঝে মাঝে তাহে ফুটিবে ফুল।

খেলাছিলে কাছে আসিয়া লহরী

চকিতে চুমিয়া পলায়ে যাবে,

শরম-বিভলা কুসুম-রমণী

ফিরাবে আনন শিহরি অমনি,

আবেশেতে শেষে অবশ হইয়া

খনিয়া পড়িয়া যাবে ।

ভেসে গিয়ে শেষে কাঁদবে সে হাস,

কিনারা কোথায় পাবে ।

মেঘ গরজনে বরষা আসিবে,

মদির-নয়নে বসন্ত হাসিবে,

বিশদ-বসনে শিশির-মালা

আসিবে স্তম্ভীরে শরত বাল ।

কূলে কূলে মোর উছলি জল,

কুলু কুলু ধোবে চরণ তল ।

কূলে কূলে মোর ফুটিবে হাসি,

বিকশিত কাশ-কুম্ভ-রাশি ।

বিমল-গগনা, বিভোর নগনা,

পূর্ণিমা নিশি জোছনা মগনা ;

ঘুম-ঘোরে কভু গাহিবে কোকিল,

দূরে দূরে কভু বাজিবে বাঁশি ।

দূর হতে আসে ফুলের বাস,

মুরছিয়া পড়ে মলয় বায় ।

দূর দূর মোর তুলিছে হিয়া

শিহরিয়া মোর উঠিছে কায় ।

এত সুখ কোথা, এত রূপ কোথা,

এত খেলা কোথা আছে,

ঘোবনের বেগে বহিয়া যাইব

কে জানে কাহার কাছে !

(ওরে) অগাধ বাসনা, অসীম আশা,

জগৎ দেখিতে চাই !

জাগিয়াছে সাধ—চরাচর ময়

প্লাবিয়া বহিয়া যাই !

যত প্রাণ আছে ঢালিতে পারি,

যত কাল আছে বহিতে পারি,

যত দেশ আছে ভুবাতে পারি,

তবে আর কিবা চাই,

পরানের সাধ তাই !

কি জানি কি হল আজি, জাগিয়া উঠিল প্রাণ,

দূর হতে শুনি যেন মহাসাগরের গান ।

সেই সাগরের পানে হৃদয় ছুটিতে চায়,

তারি পদপ্রান্তে গিয়ে জীবন টুটিতে চায় !

অহো কি মহান সুখ অনন্তে হইতে হারা,

মিশাতে অনন্ত প্রাণে, অনন্ত প্রাণের ধারা ।

ডাকে যেন—ডাকে যেন—দিক্‌ মেরে ডাকে যেন ।

আজি চারিদিকে মোর কেন কারাগার হেন ।

পৃথিবীয়ে বুকে সয়ে সমুদ্র একেলা বসি

অসীম প্রাণের কথা কহিতেছে দিবানিশি,

আপনি জানেনা যেন,

আপনি বুঝেনা যেন,

মহাসিন্ধু ধ্যানে বসি, আপনি উঠিছে বাণী !

কেহ শুনিবার নাই—নাই কোথা জনপ্রাণী।

কেবল আকাশ একা দাঁড়ায়ে রয়েছে তথা,

নীরব শিষ্যের মত শুনিছে মহান্ কথা !

কি কথারে—কি কথা সে—শুনিতে ব্যাকুল প্রাণ,

একেলা কবির মত গাহিছে কিসের গান ।

শীত নাই, গ্রীষ্ম নাই, দিন নাই রাত্রি নাই,

সঙ্গী নাই, জনপ্রাণী নাই,

একাকী চরণ প্রান্তে বসিয়া শুনিব তাই ।

আসিবে গভীর রাত্রি আঁধারে জগত ঢাকি

দিশাহারা অন্ধকারে মুদিয়া রহিব আঁখি ।

সুদুর্ভাগ্য প্রাণ উবাটিয়া,

ভেদি সেই অন্ধকার ঘোর,

কেবলি সে একতান

সমুদ্রের বেদগান

সারারাত্রি অবিশ্রাম পশিবে শ্রবণে মোর ।
 ওই যে হৃদয় মোর আস্থান শুনিতে পার,
 “কে আসিবি, কে আসিবি, কে তোরা আসিবি আয় ।
 পাঁচাণ বাঁধন টুটি, ভিজায়ে কঠিন ধরা,
 বনেরে শ্যামল করি, ফুলেরে ফুটায়ে ফরা,
 সারাপ্রাণ চালি দিয়া,
 জুড়ায়ে জগৎ-হিয়া,
 আমার প্রাণের মাঝে কে আসিবি আয় তোরা ।”
 আমি যাব’—আমি যাব’—কোথায় সে, কোন্ দেশ—
 জগতে চালিব প্রাণ,
 গাহিব করুণা গান;
 উদ্বেগ-অধীর হিয়া
 সুদূর সমুদ্রে গিয়া
 সে প্রাণ মিশাব, আর সে গান করিব শেষ ।
 ওরে চারিদিকে মোর,
 এ কি কারাগার ঘোর ।
 ভাঙ্গ্ ভাঙ্গ্ ভাঙ্গ্ কারা, আঘাতে আঘাত কর ।
 (ওরে আজ) কি গান গেয়েছে পাখী,
 এয়েছে রবির কর ।

৩০৭
 caption of freedom.

অভিমানিনী নিষারিণী ।

মহান জলধি জলে,
প্রাণ ঢেলে দিব ব'লে
সুদূর পৰ্ব্বত হোতে আসিনু বহিয়া,
পুরাতে প্রেমের সাধ,
না গণিয়া পরমাদ
কত বাধা, কত বিঘ্ন—দাপটে ঠেলিয়া
এই ত সাগর জলে মিশিনু আসিয়া !—
কিন্তু—কিন্তু তবে কেন,
আশাতে নিরাশা হেন,
কিছুই আশার মত হ'ল না ত হায়,—
যাহার আশ্রয় পেলো,
থাকিব রে হেসে খেলে
কই রে ?—সে করে না ত ভ্রক্ষেপ আশায় !
সুগম্ভীর গরজনে,
বহে সে আপন মনে
বহে সে দিগন্ত ভেদি কে জানে কোথায়,
কই রে ! সে করে না ত ভ্রক্ষেপ আশায় ।

আপনে আপনা ভুলে,
 প্রমত্ত তরঙ্গ ভুলে
 বাঘু সনে কত খেলা আপনি খেলায়,
 কখন প্রশান্ত মতি,
 কভু বা উৎসাহে অতি
 আবেশে চলিয়া পড়ে বিবশা বেলায় ;
 কই রে !—সে করে না ত ভ্রক্ষেপ আমার !

একধারে পোড়ে থাকি,
 নিজ মান নিজে রাখি
 তাহারি উল্লাসে যেন আমারো উল্লাস,
 সরোষ নির্ঘোষে তার,
 আমারো দু পারা পার
 ঢেকে ফেলি, ভেঙ্গে ফেলি তুলিয়ে উচ্ছ্বাস ।
 রাখিতে তাহার মন,
 প্রতিফলনে সবতন,
 হাসে, হানি, কাঁদে কাঁদি—মন রেখে যাই,
 মরমে মরম ঢাকি,
 তাহারি সম্মান রাখি,
 নিজের নিজস্ব ভুলে তাবৈই ধেরাই,

অভিমানিনী নিষরিণী।

কিস্ত সে ত আমা পানে ফিরেও না চায়।

নিতা স্ব যাহারি লাগি,

হইলাম সর্বত্যাগী

সে ত বে আমার পানে ফিরেও না চায়,

ভীম দর্পে করেও না ক্রক্ষেপ আমায়।

পর্বতে মায়ের কোলে

ছিনু যবে শিশুকালে

কে জানিত ভাগ্যে ছিল হেন অভিশাপ,

হ'ল সার অশ্রু ঢালা,

নিরাশ মরম জ্বালা,

দিবানিশি কুলু কুলু আকুল বিলাপ।

যখন ঝটিকা উঠে

গ্রাম পল্লী যায় লুটে

ছিন্ন ভিন্ন গতিচ্ছন্ন কোরে ফেলে মোরে,

বিনর্জি অযুত ধারা

মত্ত পাগলিনী পারা

ঝাঁপিয়া সাগরে পড়ি আশ্রয়ের তরে,

আশ্রয় কে দিবে আর ?

প্রেমোন্মত্ত পারাবার

দুঃস্থ ঋটিকা সনে নিজে যেতে রয়,
 নিজের গান্ধীনা ভুলি
 সফেন তরঙ্গ তুলি
 আলিঙ্গন আশে, পেতে দেয় রে হৃদয়।
 চপলা কটাক্ষ-বাণে
 প্রতি-কটাক্ষটি হানে,
 ঋটিকা-উচ্ছ্বাস সনে যেসায় উচ্ছ্বাস।
 আহলাদের গরজনে,
 কাঁপে দিগঙ্গনাগণে
 ওঠে পড়ে ঘন ঘন মর্ম্মভেদী স্বাস।
 আমি সে ঝঞ্ঝার তোড়ে,
 কোথা যে রয়েছে পোড়ে
 কোথা যে প্রাণের প্রাণ মিশালো আমার,
 সে দিকে কি ভ্রক্ষেপও আছে গো তাঁহার ?

তবে কি মায়ের কোলে
 উজানে যাইব চ'লে
 সুখ-সাধ সুখ আশা করি বিসর্জন ?
 সহিতে পারি না আর
 প্রণয়েতে অত্যাচার

মরমে ঢাকে না আর জ্বলন্ত বাতন।

কি হবে আমার আর

নক্ষত্র-প্রয়িত হার,

চম্পকু চামেলী বেলা অলকা ভূষণ।

আঃ ছিঃ ছিঃ ছিঃ লজ্জা করে

তরল তরঙ্গভরে

নেচে নেচে ব'হে যেতে সাগর সঙ্গম।

নিতান্ত শৈশব কালে

যখন মায়ের কোলে

লুকায়ে ছিলাম সেই নিভৃত নিলয়ে,

নিজ ভাবে ভাসিতাম,

নিজ স্রুখে হাসিতাম

নিজ মনে গাহিতাম উদার হৃদয়ে ;

দারুণ ঝটিকা হোলো,

লুকায়ে মায়ের কোলে

উঁকি মেরে দেখিতাম ভীষণ ব্যাপার,

মেঘের গর্জন সনে,

গাহিতাম নিজ মনে

কুলু কলু কলুরবে দিতাম ঝঙ্কার ;

কড় কড় বজ্র শব্দ
 শুনিয়া হতেম স্তম্ভ,
 চপলা চমকে পুনঃ আসিতাম সোরে,
 জড়ায়ে মায়ের বুক,
 পাইতাম কি যে স্মৃতি
 কি যে সে নিশ্চিত্ত ভাব কে বলিতে পারে !
 পূর্ণিমা-জোছানা রেতে
 থাকিতাম হৃদি পেতে
 আটকি রাখিতে যেন স্নান শশধরে ;
 নীহারে নীহারময়
 গিরি শৃঙ্গ সমুদয়
 সেই সে নীহার মাঝে রাখিতাম ধোরে
 পূর্ণিমার রজনীর স্নান শশধরে ।
 পাখীতে গাহিত গান
 শুনিয়া জুড়াত প্রাণ,
 শৈশব-হিল্লোলে হৃদি দিতাম খুলিয়ে,
 বরষার বারি পেলে
 পরাণ দিতাম ঢেলে,
 কি যে আমি, কোথা আমি যেতাম ভুলিয়ে,

National Library,
 Calcutta-27.

B
 891.441
 T 479 fr.

2926 dt. 18.8.88
 Rajah

সে দিন কোথায় আর,
 অন্ধকার—অন্ধকার,
 ঘেরিয়াছে চারিধার জমাট আঁধারে,
 শৈশব স্বপন গুলি,
 সব যেন গেছি ভুলি,
 চলিয়ে গোড়েছি প্রেমে প্রেম-পারাবারে,
 উজানে বহিতে তাই
 তিল মাত্র শক্তি নাই,
 যাহাতে মিশেছি এমে মিশিব তাহার ।
 মঁপিয়াছি প্রাণ মন,
 মঁপিয়াই প্রাণ মন
 দেখিব এ দক্ষ হৃদি নাহি কি জুড়ায় !
 দেখিব বিকায়ে হিয়ে
 পরাণ সর্বস্ব দিয়ে
 গম্ভীর সাগর প্রেম পাওয়া কি না যায় !
 দেখিব এ দক্ষ হৃদি নাহি কি জুড়ায় !
 না জুড়াক মন প্রাণ,
 নাই পাই প্রতিদান,
 অনন্ত যাতনে হৃদি হোক দক্ষ প্রায়,

তবুও উজ্জানে ফিরে
বেতে দাখ হয় কি রে ।
প্রাণ মন বিসর্জিয়ে রহিব হেথায়,
বাহাতে মিশেছি প্রেমে মিশিব তাহার ।

প্রভাত-উৎসব।

হৃদয় আজি মোর কেমনে গেল খুলি ।
জগত আসি দেখা করিছে কোলাকুলি ।
ধরায় আছে বত
মানুষ শত শত,
আসিছে প্রাণে মোর হাসিছে গলাগলি ।
এসেছে সখা-সখী,
বসিয়া চোখোচোখী,
দাঁড়ায় মুখোমুখী হাসিছে শিশু গুলি ।
এসেছে ভাই বোন,
পুলকে-ভরা মন,
ডাকিছে “ভাই ভাই” আঁধিতে আঁধি তুলি ।
সখারা এল ছুটে,
নয়নে তারা ফুটে,
পরানে কথা উঠে, বচন গেল ভুলি ।
সখীরা হাতে হাতে
অনিছে সাথে সাথে
দোলায় চড়ি তারা করিছে দোলাতুলি ।

শিশুরে লয়ে কোলে
 জননী এল চোলে,
 বুকেতে চেপে ধরে বলিছে “ঘুমো ঘুমো।”
 আনিত দুশয়ানে
 চাহিয়া মুখ পানে
 বাছার চাঁদ মুখে খেতেছে শত চুমো।
 পুলকে পুরে প্রাণ শিহরে কলেবর,
 প্রেমের ডাক শুনি এসেছে চরাচর।
 এসেছে রবি শশি এসেছে কোটি তারা
 ঘুমের শিয়রেতে জাগিয়া থাকে যারা।
 পরাণ পুরে গেল, হরষে হল ভোর,
 জগতে কেহ নাই সবাই প্রাণে মোর।

প্রভাত হল যেই কি জানি হল এ কি।
 আকাশ পানে চাই কি জানি কারে দেখি,
 প্রভাত বায়ু বহে
 কি জানি কি যে কহে,
 মরম মাঝে মোর কি জানি কি যে হয়।
 এস হে এস কাছে
 সখাছে এস কাছে—

এসছে ভাই এস, বস হে প্রাণ-ময়।
 পূর্ব মেঘ-মুখে পড়েছে রবি-রেখা।
 অরুণ-রথ চুড়া আধেক যায় দেখা।
 তরুণ আলো দেখে পাখীর কলরব,
 মধুর আহা কিবা মধুর মধু সব।
 মধুর মধু আলো মধুর মধু বায়,
 মধুর মধু গানে তটিনী বহে যায় ;
 যেদিকে আঁখি চায় সেদিকে চেয়ে থাকে,
 বাহারি দেখা পায় তারেই কাছে ডাকে,
 নয়ন ডুবে যায় শিশির-আঁখি-ধারে,
 হৃদয় ডুবে যায় হরষ-পারাবারে

আয়রে আয় বায়ু যারে যা প্রাণ নিয়ে,
 জনত মাঝারেতে দে রে তা প্রসারিয়ে।
 ভ্রমিবি বনে বনে যাইবি দিশে দিশে,
 সাগর পারে গিয়ে পূরবে যাবি মিশে ;
 লইবি পথ হতে পাখীর কলতান,

যুঁথীর মূহু শ্বাস

মালতী মূহু বাস,

অন্ননি তারি সাথে যা রে যা নিয়ে প্রাণ।

পাখীর গীত ধার

ফুলের বাস ভরি

ছড়াবি পথে পথে হরষে হয়ে ভোর,
অমনি তারি সাথে ছড়াবি প্রাণ মোর ।
ধরারে ঘিরি ঘিরি কেবলি বাবি ব'য়ে ;
ধরার চারিদিকে প্রাণেরে ছড়াইয়ে ।

পেরেছি এত প্রাণ

যতই করি দান

কিছুতে যেন আর ফুরাতে নারি তারে ।
আয় রে মেঘ, আয়
বারেক নেমে আয়,
কোমল কোলে তুলে আমারে নিয়ে যারে ।
কনক পাল তুলে
বাতাসে তুলে তুলে
ভাসিতে গেছে সাধ আকাশ পারাবারে ।

আকাশ, এস এস, ডাকিছ বুঝি ভাই,
গেছি ত তোরি বৃকে আমি ত হেথা নাই ।

প্রভাত-আলো নাথে ছড়ায় প্রাণ মোর,
আমার প্রাণ দিয়ে ভরিব প্রাণ তোরা।

ওঠ হে ওঠ রবি, আমারে তুলে লও,
অরুণ-তরী তব পূরবে ছেড়ে দাও।
আকাশ-পারাবার বুঝি হে পার হবে—
আমারে লও তবে—আমারে লও তবে।

জগত আনে প্রাণে, জগতে যায় প্রাণ,
জগতে প্রাণে মিলি গাহিছে একি গান।
কে তুমি মহাজ্ঞানী, কে তুমি মহারাজ,
গরবে হেলা করি হেয়োনা তুমি আজ।
বারেক চেয়ে দেখ আমার মুখ পানে,
উঠেছে মাথা মোর মেঘের মাঝ খানে।
আপনি আসি উষা শিরের বসি ধীরে,
অরুণ কর দিয়ে মুকুট দেন শিরে,
নিজের গলা হতে কিরণ মালা খুলি
দিতেছে রবি-দেব আমার গলে তুলি।
ধূলি ধূলি আমি ররেছি ধূলি পরে,
জেনেছি ভাই ব'লে জগত চরাচরে।

অনন্ত জীবন ।

অধিক করি না আশা, হিসের বিষাদ,
জনমেছি দুদিনের তরে,
যাহা মনে আসে তাই আপনার মনে
গান গাই আনন্দের ভরে ।
এ আমার গান গুলি দুদণ্ডের গান,
রবে না রবে না চির দিন,
পূরব-আকাশ হতে উঠিবে উচ্ছ্বাস
পশ্চিমেতে হইবে বিলীন ।

তা' বোলে নয়নে কেন ওঠে অশ্রু জল—
কেন তোর দুখের নিশ্বাস,
গীত গান বন্ধ করে রয়েছি বসে
কেন ওরে হৃদয় হতাশ ?
আনন্দের প্রাণ তোর, আনন্দের গান,
নাঙ্গ তাহা করিস্নে আজ—
যখন যা মনে হবে উঠিবি গাহিয়া
এই ধুপ্ত—এই তোর কাজ ।

একবার ভেবে দেখ—ভেবে দেখ মন,
 পৃথিবীতে পাখী কেন গায় ;
 জাগিয়া দেখে সে চেয়ে প্রভাত কিরণ
 আকাশেতে উথলিয়া যায় ;
 অমনি নয়নে ফোটে আনন্দের আলো,
 ক'ল তুলি মনের উচ্ছ্বাসে
 সঙ্গীত নির্ঝর স্রোতে ঢেলে দেয় প্রাণ—
 ঢেলে দেয় অনন্ত আকাশে ।
 কনক মেবেতে যেন খেলাবার তরে
 গান গুলি ছুটে বাহু তুলি,
 প্রিয়তমা পাশে বসি,—বুকের কাছেতে
 ঘেঁসে আসে ছোট ছানা গুলি ।
 কাল গান ফুরাইবে, তা'লে গাবে না কেন,
 আজ যবে হয়েছে প্রভাত ।
 আজ যবে জ্বলিছে শিশির,
 আজ যবে কুসুম কাননে
 বহিয়াছে বিমল সমীর ।
 আজ যবে ফুটেছে কুসুম,
 নলিনীর ভাঙ্গিয়াছে ঘুম,

পল্লবের শাখল-হিল্লোল,
তটিনীতে উঠেছে কল্লোল,
নয়নেতে মোহ লাগিয়াছে,
পর্যণেতে প্রেম জাগিয়াছে !

তোরা ফুল, তোরা পাখী, তোরা খোলা প্রাণ,
জগতের আনন্দ যে তোরা,
জগতের বিবাদ-পানরা ।

পৃথিবীতে উঠিয়াছে আনন্দ-লহরী
তোরা তার একেকটি ঢেউ,
কখন উঠিল আর কখন মিলালি
জানিতেও পারিল না কেউ !

কত শত উঠিতেছে, যেতেছে টুটিয়া
কে বল' রাখিবে তাহা মনে ;
তা ব'লে কি সাধ যায় লুকাইতে প্রাণ
সূর্য্যহীন আঁধার মরণে ?

যা হবে, তা হবে গোর, কিদের ভাবনা ।
রাখি শুধু মুহূর্তের আশ,
আনন্দ সাগরে সেই হইয়া একটি ঢেউ
মুহূর্তেই পাইব বিনাশ ।

প্রতিদিন কত শত ফুটে ওঠে ফুল,

প্রতি দিন ঝরে পড়ে যায়,

ফুল-বাস মৃত্যুতে ফুরায় !

প্রতি দিন কত শত পাখী গান গায়,

গান তার শুনোতে মিশায় !

ভেসে যায় শত ফুল, ভেসে যায় বাস,

ভেসে যায় শত শত গান—

তারি সাথে, তারি মাঝে দেহ এলাইয়া

ভেসে যাবি তুই মোর প্রাণ ।

তুই ফুরাইয়া গেলে গান ফুরাইবে,

কত সহে সঙ্গীতের প্রাণে ।

আবার নূতন কবি এই উপবনে,

আনিয়া বসিবে এই খানে ।

তোরি মত রহিবে সে পূরবে চাহিয়া,

দেখিবে সে উষার বিকাশ,

অমনি আপনা হতে হৃদয় উথলি

উঠিবেক গানের উচ্ছ্বাস !

তুই যাবি, সেও যাবে, একেকটি পাখী,

একেকটি সঙ্গীতের কণা,

তা' বলিয়া—যত দিন রবি শশি আছে
 জগতের গান যুগাবে না !
 তবে আর কিসের ভাবনা !
 গা'রে গান প্রভাত-কিরণে !
 যারা তোর প্রাণসখা, যারা তোর প্রিয়তম
 ওই তারা কাছে বোনে শোনে !

নাই তোর নাইরে ভাবনা,
 এ জগতে কিছুই মরে না !
 নদীশ্রোতে কোটি কোটি মৃত্তিকার কণা,
 ভেসে আসে, সাগরে মিশায়,
 জান না কোথায় তারা যায় !
 একেকটি কণা লয়ে গোপনে সাগর
 রচিছে বিশাল মহাদেশ,
 না জানি কবে তা হবে শেষ !
 মুহূর্তেই ভেসে যায় আমাদের গান,
 জান না ত কোথায় তা যায় !
 আকাশের সাগর সীমায় !
 আকাশ-সমুদ্র-তলে গোপনে গোপনে
 গীত রাজ্য হতেছে সৃজন !

যত গান উঠিতেছে ধরার আকাশে
 সেইখানে করিছে গমন !
 আকাশ পুরিয়া যাবে শেষ,
 উঠিবে গানের মহাদেশ !
 করিব গানের মাঝে বাস,
 লইব রে গানের নিখাস,
 ঘুমাইব গানের মাঝারে,
 বহে যাবে গানের বাতাস !

নাই তোর নাইরে ভাবনা,
 এ জগতে কিছুই মরে না !
 প্রাণপণে ভালবাসা ক'রে সমর্পণ
 ফিরে তাহা পেলিনে না হয় —
 বৃথা নহে নিরাশ-প্রণয় !
 নিমেষের মোহে জন্মে যে প্রেম উচ্ছ্বাস
 নিমেষেই করে পলায়ন,
 সেও কভু জানে না মরণ !
 জগতের তলে তলে তিলে তিলে পলে পলে
 প্রেমরাজ্য হতেছে সৃজন,
 সেথায় সে করিছে গমন !

কাল দেখেছিঁনু পথে হরষে খেলিতেছিল
 দুটি ভাই গলাগলি করি ;
 দেখেছিঁনু জানালায় নীরবে দাঁড়ায়েছিল
 দুটি সখা হাতে হাতে ধরি,—
 দেখেছিঁনু কচি মেয়ে মায়ের বাহুতে শুয়ে
 ঘুমায়ে করিছে স্তন পান,
 যুমন্ত মুখের পরে বরষিছে স্নেহ-ধারা
 স্নেহমাখা নত দুনয়ান ;
 দেখেছিঁনু রাজ পথে চলেছে বালক এক
 বৃদ্ধ জনকের হাত ধরি—
 কত কি যে দেখেছিঁনু হয়ত সে সব ছবি
 আজ আমি গিয়েছি পাসরি ।
 তা' বলে নাহি কি তাহা মনে ?
 ছবি গুলি মেশেনি জীবনে ?
~~কিন্তু কেন~~ হস্তিকার কণা তা'রা স্মরণের তলে পশি
 রচিতোছে জীবন আমার—
 কোথা যে কে মিশাইল, কেবা গেল কার পাশে
 চিনিতে পারিনে তাহা আর ।
 হয়ত অনেক দিন, দেখেছিঁনু ছবি এক
 দুটি প্রাণী বাহুর বাঁধনে—

তাই আজ ছুটছুটি এসেছি প্রভাতে উঠি
 সখারে বাঁধিতে আলিঙ্গনে।
 হয়ত অনেক দিন শুনেছি নু পাখী এক
 আনন্দে গাহিছে প্রাণ ধুলি,
 সহসা রে তাই আজ প্রভাতের মুখ দেখি
 প্রাণ মন উঠিছে উথলি।
 সকলি মিশিছে আসি হেথা,
 জীবনে কিছু না যায় ফেলা,
 এই যে যা'-কিছু চেয়ে দেখি
 এ নহে কেবলি ছেলে খেলা।

এই জগতের মাঝে একটি সাগর আছে
 নিস্তব্ধ তাহার জল রাশি,
 চারিদিক হতে সেথা অবিরাম অবিশ্রাম
 জীবনের শ্রোত মিশে আসি।
 সূর্য্য হতে ঝরে ধারা, চন্দ্র হতে ঝরে ধারা
 কোটি কোটি তারা হতে ঝরে,
 জগতের যত হাসি, যত গান, যত প্রাণ
 ভেসে আসে সেই শ্রোতোভরে।
 মেশে আসি সেই সিঁদু পরে।

পৃথিবী হতে মহাস্রোত ছুটিতেছে অবিরাম
 সেই মহা-সাগর উদ্দেশে ;
 আমরা মাটির কণা জলস্রোত ঘোলা করি
 অবিশ্রাম চলিয়াছি ভেসে,
 সাগরে পড়িব অবশেষে !
 জগতের মাঝখানে, সেই সাগরের তলে
 রচিত হতেছে পলে পলে,
 অনন্ত-জীবন মহাদেশ ;
 কে জানে হবে কি তাহা শেষ ?

তাই বলি প্রাণ ওরে—মরণের ভয় কোরে
 কেনরে আছিন্ ত্রিয়মাণ
 সমাপ্ত করিয়া গীত গান !
 গান গা' পাখীর মত, ফোট্রে ফুলের প্রায়,
 দ্রুত ক্ষুদ্র দুঃখ শোক ভুলি—
 গান গাও, গান গাও, এক সাথে ভেসে গাও
 তুই, আর তোর গান গুলি !
 মিশিবি সে মিল্লু জলে অনন্ত সাগর তলে,
 এক সাথে গুয়ে র'বি প্রাণ,
 তুই, আর তোর এই গান !

অনন্ত মরণ ।

কোটি কোটি ছোট ছোট মরণেরে ল'য়ে
বসুন্ধরা ছুটিছে আকাশে,
আমি মৃত্যু, তুমি মৃত্যু, মৃত্যু সকলেই,
হাসে খেলে মৃত্যু চারি পাশে ।
এ ধরণী মরণের পথ,
এ জগৎ মৃত্যুর জগৎ ।

যতটুকু বর্তমান, তারেই কি বল প্রাণ ?
সে ত শুধু পলক নিমেষ ।
অতীতের মৃত ভার পৃষ্ঠেতে র'য়েছে তার,
না জানি কোথায় তার শেষ ।
যত বর্ষ বেঁচে আছি তত বর্ষ ম'রে গেছি,
মরিতেছি প্রতি পলে পলে,
জীবন্ত মরণ মোরা, মরণের ঘরে থাকি,
জানিনে মরণ কারে বলে ।

এই জীবনের তলে কত যে মরণ আছে
 আজ আমি ভাবিতেছি তাই।—
 শৈশবে যা ছিনু আমি—হাসিতাম খেলিতাম,
 আজ আমি আর তাহা নাই।
 কাল যাহা ছিনু তাহা কাল দিবসের সাথে
 না জানি কোথায় গেছে চ'লে,
 সে আমি কোথায় গেছে! তারা সব ম'রে গেছে
 আছে এই জীবনের তলে।
 এই মুহূর্তের নীচে কত বরষের দেহ,
 কত বরষের মৃত হাসি,
 মৃত স্মৃতি, মৃত আশা, মৃত স্নেহ ভালবাসা,
 রহিয়াছে মৃত্যু রাশি রাশি।
 তাই আমি ভাবি ব'সে, (হাসি আপনার মনে)
 মৃত্যুরে হেরিয়া কেন কাঁদি?
 জীবন ত মৃত্যুর সমাধি।

শৈশবের মৃত-আমি, কালিকার মৃত-আমি,
 প্রতি নিমেষের মৃত-আমি,
 রয়েছে আমারি মাঝে, দেখ দেখি একবার
 জীবনের মাঝখানে নাহি।

কখন বা সন্ধ্যাবেলা মাঝে মাঝে যাই মোরা
 জীবনের সমাধি-ভবনে,
 মৃত-শৈশবের তরে আঁখি হতে বারি ঝরে,
 মুখ তার পড়ে বুঝি মনে !
 সাধের দিবস গুলি যেখানেতে শুয়ে আছে
 সেখানেতে ভ্রমিয়া বেড়াই,
 পরিশ্রান্ত হৃদয় জুড়াই !

এক মুঠা মরণেরে জীবন বলে কি তবে,
 মরণের সমষ্টি কেবল ?
 একটি নিমেষ তুচ্ছ শত মরণের গুচ্ছ !
 নাম নিয়ে এত কোলাহল !
 মরণ বাড়িবে যত জীবন বাড়িবে তত,
 পলে পলে উঠিব আকাশে,
 নক্ষত্রের কিরণ নিবাসে ।

ভাবিতেছি কল্পনায়, কত কাল গেছে চলে,
 বয়স্ক্রম সহস্র বরষ,
 মরণের স্তরে স্তরে অতি দীর্ঘ—দীর্ঘ প্রাণ,
 কোন্ শূন্য করেছে পরশ !

হয়ত গিয়েছি আমি, কত শত গ্রহ ছুঁয়ে,
 বৃহস্পতি গ্রহের মাঝারে,
 জীবনের এক প্রান্ত রয়েছে পৃথিবী মাঝে ।
 শেষ প্রান্ত বৃহস্পতি পারে ।
 একেলা র'য়েছি বসি, সহস্র মরণ রাশি,
 দীর্ঘকায় মরণ তাপস ।
 সন্ধ্যা হয়ে আসিয়াছে, অন্ধকার ফুটিতেছে,
 শ্রান্ত দেহ হয়েছে অবশ ।—
 শুধু দেখিতেছি চেয়ে সুদীর্ঘ জীবন ক্ষেত্রে,
 অতীতের দিগন্তের পানে,
 অতিক্রম দেখা যায় পৃথিবী জ্যোতির কণা
 জড়িত রয়েছে সেইখানে,
 তারি পানে কতক্ষণ চাহিয়া চাহিয়া শেষে—
 হয়ত সহসা কি কারণে,
 আভিকার যে মুহূর্তে এত কথা ভাবিতেছি
 এ মুহূর্তে পড়িবে স্মরণে !
 পৃথিবীর কত খেলা, পৃথিবীর কত কথা,
 পরাণেতে বেড়াইবে ভেসে,
 পৃথিবীর সহচর না জানি কোথায় তারা
 গেছে কোন্ তারকার দেশে ।

হয়ত পড়িবে মনে, পৃথিবীর প্রান্তে বসি
 গেয়েছিঁছু যে কয়টি গান,
 সে গানের বিষ গুলি হয়ত এখনো ভাসে
 ধরার স্রোতের মাঝখান।

ভাবিয়া, হাসিব মৃদু হাসি,
 ভাবিয়া, ফেলিব অশ্রু-রাশি।

সহস্র বরষ পরে, সেই গ্রহ মাঝে বসি,
 না জানি গাঁহিব সে কি গান।
 কি অনন্ত মন্দাকিনী না জানি ছুটিবে, যবে
 খুলে যাবে সে বিশাল-প্রাণ।
 মরণের সঙ্গীত মহান্।

হয়ত বা সে নিশীথে কবি এক পৃথিবীতে
 চেয়ে আছে মোর গ্রহ পানে ;
 মহান্ সঙ্গীত-ধারা গ্রহ হতে গ্রহে ঝরি
 পশিবেক তাহার পরাণে।
 বিস্ফারিত করি অঁাখি শিহরিত কলেবরে
 শুনিবে সে আধ-শোনা গান,
 কত কি উঠিবে মনে ব্যক্ত করিবার তরে
 আকুল ব্যাকুল হবে প্রাণ।

আপনার কথা শুনে আপনি বিস্মিত হবে,
 চাহিয়া রহিবে অবিরত
 নিদ্রাহীন স্বপ্নটির মত
 নয়নে পড়িবে অশ্রুজল,
 বুঝিবেনা, শুনিবে কেবল।

মরণ বাড়িবে যত কোথায়—কোথায় যাব;
 বাড়িবে প্রাণের অধিকার,
 বিশাল প্রাণের মাঝে কত গ্রহ কত তারা
 হেথা হোথা করিবে বিহার।
 উঠিবে জীবন মোর কতনা আকাশ ছেয়ে
 ঢাকিয়া ফেলিবে রবি শশি,
 যুগ যুগান্তর যাবে নব নব রাজ্য পাবে
 নব নব তারায় প্রবেশি।
 কবেরে আসিবে সেই দিন
 উঠিব সে আকাশের পথে,
 আমার মরণ ভোর দিয়ে
 বেঁধে দেব জগতে জগতে।
 আমার মরণ-ভোর দিয়ে

গোঁথে দেব জগতের মালা,

রবি শশি একেকটি ফুল,

চরাচর কুসুমের ডালা ।

তোরাও আসিবি ভাই, উঠিবিরে দশ দিকে,

এক সাথে হইবে মিলন,

ডোরে ডোরে লাগিবে বাঁধন !

আমাদের মরণের জালে

জগৎ ফেলিব আবরিয়া,

এ অনন্ত আকাশ সাগরে

দশ দিক রহিব ঘেরিয়া !

পড়িবে তপন তায়, চন্দ্রমা জড়ায়ে যাবে,

পড়িবেক কোটি কোটি তারা

পৃথ্বী কোথা হ'য়ে যাবে হারা !

আয় ভাই সব যাই ভুলি,

সকলে করিবে কোলাকুলি ।

সে কিরে আনন্দ মহোৎসব,

জগতেরে ফেলিব ঘেরিয়া,

আমাদের মরণের মাঝে

চরাচর বেড়াবে ঘুরিয়া !

জয় হোক জয় হোক মরণের জয় হোক

আমাদের অনন্ত মরণ,

মরণের হবে না মরণ !

এ ধরায় মোরা সরে শতাব্দীর ক্ষুদ্র শিশু

লইলাম তোমার শরণ,

এস তুমি এস কাছে, স্নেহ কোলে লও তুমি

পিয়াও তোমার মাতৃস্নান,

আমাদের করছে পালন !

বাড়িব তোমার স্নেহে, নববল পাব দেহে,

ডাকিব হে জননী বলিয়া,

তোমার অঞ্চল ধরি জগতের খেলাঘরে,

অবিরাম বেড়াব খেলিয়া !

হেথা নাবি হোথা উঠি করিব রে ছুটাছুটি,

বেড়াইব তারায় তারায়,

স্বকুমার বিদ্যুতের প্রায় !

আনন্দে পূরেছে প্রাণ, হেরিতেছি এ জগতে

মরণের অনন্ত উৎসব,

কার নিমন্ত্রণে মোরা, মহা যজ্ঞে এসেছিরে

উঠেছে মহান্ কলরব ।

যে ডাকিছে ভাল বেমে, তারে চিনিস্নে শিশু ?

তার কাছে কেন তোর ডর,

জীবন যাহারে বলে মরণ তাহারি নাম,

মরণ ত নহে তোর পর ।

আয় তারে আলিঙ্গন কর,

আয়, তার হাত খানি ধর !



পুনর্মিলন।

কিসের হরষ কোলাহল,
শুধাই তোদের, তোরা বল !

আনন্দ মাঝারে সব উঠিতেছে ভেসে ভেসে,

আনন্দে হতেছে কঁছু লীন,

এমন দেখিনি কবে—এমন দেখিনি কাল,

এমন দেখিনি বহু দিন।

প্রকৃতি গো, জননি গো, খেলাতেম ছেলেবেলা,
তোমার কোলের কাছে কত কি—কত কি খেলা।

ছুটি ছোট ছোট হাতে তোমারে জড়িয়ে ধ'রে,

তোমার মুখের পানে চাহিতাম প্রাণ ভোরে।

এখনো সে মনে আছে—শীতের সকাল হলে,

তাড়াতাড়ি ফুলবনে একেলা যেতেম চলে ;—

নবীন রবির আলো,

সে যে কি লাগিত ভাল।

বিমল কনক স্নগ্ধা যেনরে করিয়া পান,
 কি জানি কি হয়ে যেত সেই বালকের প্রাণ !
 প্রভাত শিশির গুলি ঘাস হতে তুলিতাম,
 কপালে কপোলে মোর ফোঁটা ফোঁটা ফেলিতাম ।
 তরুণ ফুলের মত ফুটিয়া উঠিত প্রাণ,
 বিমল কোমল হৃদে কি যেন ঝরিত গান ।
 এখনো সে মনে আছে সেই স্তব্ধ দ্বিপ্রহরে,
 জানালার কাছে বসে একেলা বিজন ঘরে,
 চারিদিক স্তব্ধ হেরি কি যেন করিত প্রাণ,
 যতদূর দেখা যায় চেয়ে আছে দু' নয়ান ।
 মাঝে মাঝে সমীরণ গায়েতে লাগিত এসে,
 সমুদ্রের প্রান্ত হতে,
 কল্লনার তীর হতে—

সেই সমীরণ স্রোতে কি যেন আসিত ভেসে ।
 কত মায়া, কত পরী, উপন্যাস কত শত,
 সেই বাতাসের সাথে ছিল যেন বিজড়িত !
 মনে পড়ে আমাদের ছিল এক ছোট ঘর,
 জাহ্নবী বহিয়া যায়, তরু করে মরমর্ !
 আমরা দুইটি ভাই সেথায় র'য়েছি বসে,
 জাহ্নবী-প্রবাহ পানে চেয়ে আছি অনিমিষে ।

নিভৃত গাছের ছায়

ঝরু ঝরু বহে বায়,

বকুলের ফুলগুলি ঝরে ঝরে পড়ে যায়—

চেউ গুলি ব'হে যায়—তরি গুলি ভেসে যায়—

চেয়ে আছি—চেয়ে আছি—সারাদিন চলে যায়।

যেমন নদীতে চেউ উঠিছে পড়িছে কত,

বালক কল্পনা মনে ওঠে পড়ে কত শত।

হয়ত বরষা কাল—ঝর ঝর বারি ঝরে,

পুলক-রোমাঞ্চ ফুটে জাহ্নবীর কলেবরে ;

থেকে থেকে বন বন,

ঘন বাজ বরষণ,

থেকে থেকে বিজলীর চমকিত চকমকি।

বহিছে পূর্ব বায়,

শীতে শিহরিছে কায়,

গহন জনদে দিবা হয়েছে আঁধার-মুখী।

মাধ যেত যাই ভেসে,

নূতন—নূতন দেশে,

তুলায়ে তুলায়ে চেউ কোথা নিয়ে যেত শেষে।

কুলে কত নিকেতন,

কত বন, উপবন,

কত গাছ, কত ছায়া, জটিল বটের মূল—

তীরে বালুকার পরে,

ছেলে মেয়ে খেলা করে,

সন্ধ্যায় ভাসায় দীপ, প্রভাতে ভাসায় ফুল।

ভাসিতে ভাসিতে শুধু দেখিতে দেখিতে যাব,

কত দেশ, কত মুখ, কত কি দেখিতে পাব।

কোথা বালকের হাসি,

কোথা রাখালের বাঁশি,

সহসা স্মদূর হতে অচেনা পাখীর গান।

কোথাও বা দাঁড় বেয়ে

মাকী গেল গান গেয়ে,

কোথাও বা তীরে ব'সে পথিক ধরিল তান।

গুনিতে গুনিতে যাই আকাশেতে তুলে আঁখি,

আকাশেতে ভাসে মেঘ—আকাশেতে ওড়ে পাখী।

সেই—সেই ছেলে বেলা,

আনন্দে করেছি খেলা,

প্রকৃতি গো—জননি গো—কেবলি তোমারি কোলে।

তার পরে কি যে হল—কোথা যে গেলেম চলে।

হৃদয় নামেতে এক বিশাল অরণ্য আছে,
 দিশে দিশে নাহিক কিনারা,
 তারি মাঝে হ'লু পথহারা !
 সে বন আঁধারে ঢাকা,
 গাছের জটিল শাখা
 সহস্র স্নেহের বাহু দিয়ে
 আঁধার পালিছে বুকে নিয়ে ।
 নাহি রবি নাহি শশি, নাহি গ্রহ, নাহি তারা,
 কে জানে কোথায় দিগ্বিদিক !
 আমি শুধু একেলা পথিক !
 তোমারে গেলেম ফেলে,
 অরণ্যে গেলেম চলে,
 কাটালেম কত শত দিন,
 ত্রিয়মান—স্বথশাস্তি হীন !

আজিকে একটি পাখী পথ দেখাইয়া মোরে
 আনিল এ অরণ্য বাহিরে,
 আনন্দের সমুদ্রের তীরে !
 সহসা দেখিছু রবিকর,
 সহসা শুনিচু কত গান,

সহসা পাইনু পরিমল,
 সহসা ধুলিয়া গেল প্রাণ !
 দেখিনু ফুটিছে ফুল, দেখিনু উড়িছে পাখী,
 আকাশ পূরেছে কলস্বরে !
 জীবনের চেউগুলি ওঠে পড়ে চারিদিকে,
 রবিকর নাচে তার পরে !
 চারিদিকে বহে বায়ু, চারিদিকে ফুটে আলো,
 চারিদিকে অনন্ত আকাশ,
 চারিদিক পানে চাই, চারিদিকে প্রাণ ধায়,
 জগতের অসীম বিকাশ !
 কেহ এসে বসে কোলে, কেহ ডাকে সখা বোলে,
 কাছে এসে কেহ করে খেলা,
 কেহ হাসে, কেহ গায়, কেহ আসে, কেহ যায়,
 এ কি হেরি আনন্দের মেলা !
 যুবক যুবতী হাসে, বালক বালিকা নাচে,
 দেখে যে রে জুড়ায় নয়ন !
 ও কে হোথা গান গায়, প্রাণ কেড়ে নিয়ে যায়,
 ও কি গুনি অমিয়-বচন !
 কেহে তুই কচি মেয়ে, বুকের কাছেতে এসে
 কি কথা কহিস্ ভাঙ্গা ভাঙ্গা,

প্রভাতে প্রভাত ঢালে হাসির প্রবাহ তোর,
আধফুটে চৌটি রাঙা রাঙা ।

তাই আজি শুধাই তোমারে,
কেন এ আনন্দ চারি ধারে !

বুকেছি গো বুকেছি গো — এতদিন পরে বুঝি,
ফিরে পেনে হারান' সস্তান ।

তাই বুঝি দুই হাতে জড়িয়ে লয়েছ বুকে,
তাই বুঝি গাহিতেছ গান ।

তাই বুঝি ছুটে আসে সমীরণ মোর পাশে,
বারবার করে আলিঙ্গন,

আকাশ আনন্দভরে আমার মাথার পরে
করিছে প্রভাত বরিষণ !

তাই বুঝি মেঘমালা পূরব দুয়ার হতে
স্নেহ দৃষ্টে মোর মুখে চায় !

তাই বুঝি চরাচর তাহার বুকের মাঝে
বারবার ডাকিছে আমায় !

ওই শোন পাখী গায় — শতবার ক'রে গায়,
ওই দেখ ফুটে ওঠে ফুল !

আমি কে গো, জননি গো, আমারে হেরিয়া কেন

এরা এত হাসিয়া আকুল !

ছোট ছোট ফুলগুলি ওদের হেরিয়ে হাসি

প্রাণমন পুরিল উল্লাসে !

প্রভাতের শিশুগুলি কেমনে চিনিল মোরে ?

মোরে কেন এত ভাল বাসে ?

মরি মরি কচি হাসি ন্নেহের বাছনি তোরা

মোরে যদি এত লাগে ভাল,

প্রতিদিন ভোর হলে আসিব তোদের কাছে,

না ফুটিতে প্রভাতের আলো !

বায়ুভরে ঢলি ঢলি করিবিরে গলাগলি,

হেরিব তোদের হাসিমুখ,

তোদের শোনাব গান, তোদের দেখাব প্রাণ

উদ্বাঢ়িয়া পরাণের স্মৃতি !

ভালবাসা খুঁজিবারে গেছিছু অরণ্যমাঝে

হৃদয়ে হইছু পথহারা,

বরষিছু অশ্রুবারি ধারা !

অমিলাম দূরে দূরে—কে জানিত বল দেখি,

হেথা এত ভালবাসা আছে !

যে দিকেই চেয়ে দেখি সেই দিকে ভালবাসা

ভাসিতেছে নয়নের কাছে ।

হেথা যারে ভালবাসি ফিরে দেয় ভালবাসা,

নাই হেথা নিরাশ প্রণয় ।

কাদিলে কাদিতে থাকে, হাসিলে হাসিয়া ওঠে

জগতের করুণ হৃদয় ।

মা আমার, আজ আমি কতশত দিন পরে

যখনিরে দাঁড়ানু সম্মুখে,

অমনি চুমিলি মুখ, কিছু নাই অভিমান,

অমনি লইলি তুলে বুকে ।

ছাড়িব না তোর কোল, র'ব হেথা অবিরাম,

তোর কাছে শিখিবরে স্নেহ,

সবারে বাসিব ভাল ; কেহ না নিরাশ হবে

মোরে ভাল বাসিবে যে কেহ ।

প্রতিধ্বনি ।

অয়ি প্রতিধ্বনি,

বুঝি আমি তোরে ভালবাসি,

বুঝি আর কারেও বাসি না,

আমারে করিলি তুই আকুল ব্যাকুল,

তোর লাগি কাঁদে মোঁর বীণা ।

তোর মুখে পাখীদের শুনিয়া সঙ্গীত,

নির্ব্বরের শুনিয়া স্বর,

গভীর রহস্যময় অরণ্যের গান,

বালকের মধুমাখা স্বর,

তোর মুখে জগতের সঙ্গীত শুনিয়া,

তোরে আমি ভাল বাসিয়াছি ;

তবু কেন তোরে আমি দেখিতে না পাই,

বিশ্বময় তোরে খুঁজিয়াছি !

যখন পাখীটি গেয়ে ওঠে,

অমনি শুনিলে তোর গান,

চমকিয়া চারি দিকে চাই,

কোথা—কোথা—কাঁদেরে পরাণ ।

তখনি খুঁজিতে যাই কাননে কাননে,
ভেমি আমি গুহায় গুহায়,
ছুটি আমি শিখরে শিখরে,
হেরি আমি হেথায় হোথায় ।
যখনি ডাকিরে তোরে কাতর হইয়া,
দূর হ'তে দিস্ তুই সাড়া,
অমনি সে দূর পানে যাই আমি ছুটে,
কিছু নাই মহাশূন্য ছাড়া !
অয়ি প্রতিধ্বনি,
কোথা তোর ঘুমের কুটীর !
কোথা তোর স্বপনের পাড়া !

চির কাল—চির কাল—তুই কিরে চিরকাল
সেই দূরে র'বি ।
আধ' সুরে গাবি শুধু গীতের আভাস,
তুই চির-কবি ?
দেখা তুই দিবি না কি ? না হয় না দিলি,
একটি কি পুরাবিনা আশ,
কাছে হতে একবার শুনিবারে চাই
তোর গীতোচ্ছাস !

অরণ্যের, পর্বতের, সমুদ্রের গান,
 ঝটিকার বজ্রগীত স্বর,
 দিবসের, প্রদোষের, রজনীর গীত,
 চেতনার, নিদ্রার, মর্শ্বর,
 বসন্তের, বরষার, শরতের গান,
 জীবনের, মরণের, স্বর,
 আলোকের পদধ্বনি মহা অন্ধকারে
 ব্যাপ্ত করি বিশ্ব চরাচর,
 পৃথিবীর, চন্দ্রমার, গ্রহ তপনের,
 কোটি কোটি তারার সঙ্গীত,
 তোর কাছে জগতের কোন্ মাঝখানে
 না জানিরে হতেছে মিলিত ।
 সেই খানে একবার বসাইবি মোরে ;
 সেই মহা আঁধার নিশায়,
 গুনিবরে অঁখি মুদি বিশ্বের সঙ্গীত,
 তোর মুখে কেমন গুণায় ।

তোরে আমি দেখিনি কখনো,
 তবুরে অতুল রূপরশি

তোর আধ' কণ্ঠস্বর সম,
 প্রাণে আধ' বেড়াইছে ভাসি ।
 তারে দেখিবারে চাই—তারে ধরিবারে চাই,
 সেই মোরে করেছে পাগল,
 তারি তরে চরাচরে সুখ শান্তি নাই
 তারি তরে পরাণ বিকল ।

জোছনায় ফুলবনে একাকী বসিয়া থাকি,
 আঁখি দিয়া অশ্রুবারি ঝরে,
 বল্ মোরে বল্ অগ্নি মোহিনী ছলনা,
 সে কি তোরি তরে ?
 বিরামের গান গেয়ে নায়াফের বায়
 কোথা বহে যায় ।
 তারি সাথে কেন মোর প্রাণ ছুঁ করে
 সে কি তোরি তরে ।
 বাতাসে সুরতি ভাসে, আঁধারে কত না তারা,
 আকাশে অসীম নীরবতা,
 তখন প্রাণের মাঝে কত কথা ভেসে যায়,
 সে কি তোরি কথা ?
 ফুলের মৌরভ গুলি আকাশে খেলাতে এসে

বাতাসেতে হয় পথহারা,
চারিদিকে ঘুরে হয় সারা,
মার কোলে ফিরে যেতে চায়,
ফুলে ফুলে খুঁজিয়া বেড়ায় ।

তেমনি প্রাণের মাঝে অশরীরী আশাগুলি,
ভ্রমে কেন হেথায় হোথায়,
সে কি তোরে চায় ?

অঁাখি যেন কার তরে পথ পানে চেয়ে আছে,
দিন গণি গণি,
মাঝে মাঝে করি মুখে সহসা দেখে সে যেন
অতুল রূপের প্রতিধ্বনি,
কাছে গেলে মিলাইয়া যায়,
নিরাশার হাসিটির প্রায়,—
সৌন্দর্যের মরীচিকা এ কাহার মায়া ?
এ কি তোরি ছায়া ?

জগতের গান গুলি দূর দূরান্তর হ'তে
দলে দলে তোর কাছে যায়,
যেন তারা, বহি হেরি পতঙ্গের মত,
পদতলে মরিবারে চায় ।

জগতের মৃত গান গুলি
 তোর কাছে পেয়ে নব প্রাণ,
 সঙ্গীতের পরলোক হ'তে
 গায় যেন দেহমুক্ত গান !
 তাই তার নব কণ্ঠ ধ্বনি,
 প্রভাতের স্বপনের প্রায়,
 কুসুমের সৌরভের সাথে
 এমন সহজে মিশে যায় !

আমি ভাবিতেছি ব'সে গান গুলি তোরে
 না জানি কেমনে খুঁজে পায়।
 না জানি কোথায় খুঁজে পায়।
 না জানি কি গুহার মাঝারে
 অশ্রুট মেঘের উপবনে,
 স্মৃতি ও আশার বিজড়িত
 আলোক-ছায়ার সিংহাসনে,
 ছায়াময়ী মূর্তি খানি আপনে আপনি মিশি
 আপনি বিস্তৃত আপনায়,
 কার পানে শূন্য পানে চায়।
 দায়িত্বে প্রশান্ত রবি স্বর্গময় মেঘ মাঝে
 পশ্চিমের সমুদ্রে সীমায়,

প্রভাতের জন্মভূমি শৈশব পূরব পানে,
 যেমন আকুল নেত্রে চায়,
 পূরবের শূন্য পটে প্রভাতের স্মৃতি গুলি
 এখনো দেখিতে যেন পায়,
 তেমনি সে ছায়াময়ী কোথা যেন চেয়ে আছে
 কোথা হতে আসিতেছে গান,
 এলানো কুন্তল জালে সন্ধ্যার তারকা গুলি
 গান শুনে মুদিছে নয়ান !
 বিচিত্র মৌন্দর্য্য জগতের
 হেথা আসি হইতেছে লয় !
 সঙ্গীত, সৌরভ, শোভা, জগতে যা কিছু আছে,
 সবি হেথা প্রতিধ্বনিময় !
 প্রতিধ্বনি, তব নিকেতন,
 তোমার সে মৌন্দর্য্য অতুল,
 প্রাণে জাগে ছায়ার মতন,
 ভাষা হয় আকুল ব্যাকুল !
 আমরণ, চিরদিন, কেবলি খুঁজিব তোরে,
 কখন কি পাবনা সন্ধান !

কেবলি কি র'বি দূরে, অতি দূর হ'তে

শুনিবরে ওই আধ' গান।

এই বিশ্ব জগতের মাঝখানে দাঁড়াইয়া

বাজাইবি মোন্দরোর বাঁশি,

অনন্ত জীবন পথে খুঁজিয়া চলিব তোরে

প্রাণ মন হইবে উদাসী !

তপনেরে ঘিরি ঘিরি যেমন ঘুরিছে ধরা,

ঘুরিব কি তোর চারি দিকে।

অনন্ত প্রাণের পথে বরষিবি গীত ধারা

চেয়ে আমি-র'ব' অনিমিখে।

তোরি মোহময় গান শুনিতেছি অবিরত

তোরি রূপ কল্পনার লিখা,

করিস্নে প্রবঞ্চনা, লত্যা ক'রে বন্ দেখি,

তুইত নহিস্ মরীচিকা ?

কতবার আর্তস্বরে, শুধায়েছি প্রাণ পণে

অয়ি তুমি কোথায়—কোথায়—

অমনি স্তদূর হতে কেন তুমি বলিয়াছ,

“কে জানে কোথায় ?”

আশাময়ী, ওকি কথা ! তুমি কি আপনাবারা !

আপনি জাননা আপনার ?

মহাঈশ্বৰ ।

পূৰ্ণ কৰি মহাকাল পূৰ্ণ কৰি অনন্ত গগন,
নিদ্রামগ্ন মহাদেব দেখিছেন মহান্ স্বপন ।

বিশাল জগত এই

প্ৰকাণ্ড স্বপন সেই,

হৃদয়-সমুদ্রে তাঁৰ উঠিতেছে বিশ্বের মতন ।
উঠিতেছে চন্দ্ৰ সূৰ্য্য, উঠিতেছে আলোক আঁধাৰ,
উঠিতেছে লক্ষ লক্ষ নক্ষত্ৰের জ্যোতি পৰিবাৰ ।
উঠিতেছে, ছুটিতেছে এহ উপএহ দলে দলে,
উঠিতেছে ডুবিতেছে ৰাত্ৰি দিন, আকাশের তলে !
একা বসি মহা-সিদ্ধু চিৰ দিন গাইতেছে গান,
ছুটিয়া সহস্ৰ নদী পদতলে গিনাইছে প্ৰাণ ।
তটিনীৰ কলবব, লক্ষ নিকৰের ঝৰ ঝৰ,
সিদ্ধুৰ গম্ভীৰ গীত মেঘের গম্ভীৰ কণ্ঠ স্বৰ ;
ঝটিকা কৰিছে হা হা আশ্রয় আলয় তার ছাড়ি,
বাজায়ে অৱণ্য-বীণা ভীমবল শত বাজু নাড়ি ;
ৰুদ্ৰৰাগ আনাপিয়া গড়ায়ে পড়িছে হিম-ৰাশ,
পৰ্বত-দৈত্যের যেন ঘনীভূত ঘোর অট্ট হাস ;

ধীরে ধীরে মহারণ্য নাড়িতেছে জটায়ু মাথা,
 বর বর মর মর উঠিতেছে সুগভীর গাথা ।
 চেতনার কোলাহলে দিবস পূরিছে দশা দিশি,
 ঝিল্লি-রবে একমন্ত্র জপিতেছে তাপসিনী নিশি,
 সমস্ত একত্রে মিলি ধনিয়া ধনিয়া চারিভিত,
 উঠাইছে মহা-হৃদে মহা এক স্বপন-সঙ্গীত ।
 স্বপনের রাজ্য এই, স্বপন-রাজ্যের ছীবগণ,
 দেহ ধরিতেছে কত মুহুমূর্ত্ত নূতন নূতন ।
 ফুল হয়ে যায় ফল, ফুল ফল বীজ হয় শেষে,
 নব নব বৃক্ষ হয়ে বেঁচে থাকে কানন-প্রদেশে ।
 বাষ্প হয়, মেঘ হয়, বিন্দু বিন্দু বৃষ্টি বারি ধারা,
 নিরব তটিনী হয়, ভাঙ্গি ফেলে শিলারয় কারা ।
 নিদাঘ মরিয়া যায়, বরষা শ্মশানে আসি তার
 নিভায় জ্বলন্ত চিতা বরষিয়া অশ্রুবারি ধার ।
 বরষা হইয়া বৃদ্ধ শ্বেত-কেশ শীত হয়ে যায়,
 যযাতির মত পুন বসন্ত-যৌবন ফিরে পায় ।
 এক শুধু পুরাতন, আর সব নূতন নূতন,
 এক পুরাতন হৃদে উঠিতেছে নূতন স্বপন ।
 অপূর্ণ স্বপন-সৃষ্ট মানুষেরা অভাবের দাস,
 জগীত পূর্ণতা তরে পাইতেছে কত না প্রয়াস ।

চেতনা, ছিঁড়িতে চাহে আধ'-অচেতন আবরণ,
 দিন-রাত্রি এই আশা, এই তার এক মাত্র পণ।
 পূর্ণ আত্মা জাগিবেন, কভু কি আসিবে হেন দিন ?
 অপূর্ণ জগত-স্বপ্ন ধীরে ধীরে হইবে বিলীন ?
 চন্দ্র সূর্য্য তারকার অন্ধকার স্বপ্নময়ী ছায়া,
 জ্যোতির্শ্ময় সে হৃদয়ে ধীরে ধীরে মিলাইবে কায়া।
 পৃথিবী ভাঙ্গিয়া যাবে, একে একে গ্রহ তারা গণ
 ভেঙ্গে ভেঙ্গে মিলে যাবে, একেকটি বিশ্বের মতন।
 চন্দ্র সূর্য্য গ্রহ চেয়ে জ্যোতির্শ্ময় মহান্ বহু,
 জীব-আত্মা মিলাইবে একেকটি জনবিশ্ব বহু !
 কভু কি আসিবে, দেব, সেই মহা স্বপ্ন-ভাঙ্গা দিন,
 মতের সমুদ্র মাঝে আধ'-সত্য হয়ে যাবে লীন ?
 অধেক প্রলয় জলে ডুবে আছে তোমার হৃদয়,
 বল, দেব, কবে হেন প্রলয়ের হইবে প্রলয় ?

সৃষ্টি স্থিতি প্রলয় ।

দেশ-শূন্য, কাল শূন্য, জ্যোতি-শূন্য মহাশূন্য পরি

চতুর্মুখ করিছেন ধ্যান,

মহা অন্ধ অন্ধকার সভয়ে রয়েছে দাঁড়াইয়া—

কবে দেব খুলিবে নয়ান !

অনন্ত হৃদয় মাঝে আসন্ন জগত চরাচর

দাঁড়াইয়া স্তম্ভিত নিশ্চল,

অনন্ত হৃদয়ে তাঁর ভূত ভবিষ্যৎ বর্তমান

ধীরে ধীরে বিকাশিছে দল !

লেগেছে ভাবের ঘোর, মহানন্দে পূর্ণ তাঁর প্রাণ

নিজের হৃদয় পানে চাহি,

নিস্তরঙ্গ রহিয়াছে অনন্ত আনন্দ পারাবার,

কুল নাহি, দিগ্বিদিক নাহি !

পুলকে পূর্ণিত তাঁর প্রাণ,

সহসা আনন্দ-সিঙ্গু হৃদয়ে উঠিল উথলিয়া,

আদিদেব খুলিলা নয়ান,

জনশূন্য জ্যোতিশূন্য অন্ধতম অন্ধকার মাঝে

উজ্জ্বলি উঠিল বেদগান !

চাৰি মুখে বাহিৰিল বাণী
 চাৰিদিকে কৰিল প্ৰাণ !
 সীমাহারা মহা অন্ধকাৰে,
 সীমা শূন্য বোম-পাৰাবাৰে,
 প্ৰাণ-পূৰ্ণ ঋতিকাৰ মত,
 ভাবপূৰ্ণ ব্যাকুলতা সম
 আশপূৰ্ণ অতৃপ্তিৰ প্ৰায়,
 সঞ্চৰিতে লাগিল সে ভাষা ।
 দূৰ—দূৰ—যত দূৰ যায়
 কিছুতেই অন্ত নাহি পায়,
 যুগ যুগ যুগ-যুগান্তৰ,
 অগিতেছে আত্মিও সে বাণী,
 আজিও সে অন্ত নাহি পায় ।

ভাবেৰ আনন্দে ভোর, গীতি-কবি চাৰি মুখে
 কৰিতে লাগিল বেদ-গান ।

আনন্দেৰ আন্দোলনে ঘন ঘন বহে শ্বাস,
 অষ্ট নেত্ৰে বিক্ষুব্ধ জ্যোতি !
 জ্যোতিৰ্ময় জটাজাল কোটি সূৰ্য্য প্ৰভা সম,
 দিশিদিিকে পড়িল ছড়ারে

মহান্ ললাটে তাঁর অযুত তড়িত-ক্ষুতি

অবিরাম লাগিল খেলিতে ।

অনন্ত ভাবের দল, হৃদয় মাঝারে তাঁর

হতেছিল আকুল ব্যাকুল,

মুক্ত হয়ে ছুটিল তাহারা,

জগতের গঙ্গোত্রী শিখর হতে

শত শত স্রোতে

উচ্ছসিল অগ্নিময় বিশ্বের নিব্বার,

বাহিরিল অগ্নিময়ী বাণী,

উচ্ছসিল বাষ্পময় ভাব !

উত্তরে দক্ষিণে গেল,

পূরবে পশ্চিমে গেল,

চারিদিকে ছুটিল তাহারা,

আকাশের মহাক্ষেত্রে শৈশব-উচ্ছাস-বেগে

নাচিতে লাগিল মহোল্লাসে ।

শব্দ-শূন্য শূন্য মাঝে, সহসা সহস্র স্বরে

জয়ধ্বনি উঠিল উথলি,

হর্ষধ্বনি উঠিল ফুটিয়া,

স্তব্ধতার পাশাণ-হৃদয়

শত ভাগে গেলরে ফাটিয়া,

শব্দ শ্রোত করিল চৌদিকে ।

এক কালে সমস্তরে—

পূর্বে উঠিল ধনি পশ্চিমে উঠিল ধনি,

ব্যাপ্ত হল উত্তরে দক্ষিণে ।

অসংখ্য ভাবের দল খেলিতে লাগিল যত

উঠিল খেলার কোলাহল ।

শূন্যে শূন্যে মাতিয়া বেড়ায়

হেথা ছোট্টে, হেথা ছুট্টে যায় ।

কি করিবে আপনা লইয়া

যেন তাহা ভাবিয়া না পায়,

আনন্দে ভাবিয়া যেতে চায় ।

যে প্রাণ অনন্ত যুগ রবে

সেই প্রাণ পেয়েছে নূতন,

আনন্দে অনন্ত প্রাণ যেন,

মূহূর্ত্তে করিতে চায় ব্যয় !

অবশেষে আকাশ ব্যাপিয়া

পড়িল প্রেমের আকর্ষণ ।

এ ধায় উহার পানে,

এ চায় উহার মুখে,

আগ্রহে ছুটিয়া কাছে আসে ।

বাষ্পে বাষ্পে করে ছুটাছুটি,
 বাষ্পে বাষ্পে করে আলিঙ্গন !
 অগ্নিময় কাতর হৃদয়
 অগ্নিময় হৃদয়ে মিশিছে !
 জ্বলিছে দ্বিগুণ অগ্নি রাশি
 আঁধার হতেছে চুর চুর !
 অগ্নিময় মিলন হইতে
 জন্মিতেছে আগ্নেয় সম্ভান,
 অক্লকার শূন্য-যরু মাঝে
 শত শত অগ্নি-পরিবার
 দিশে দিশে করিছে ভ্রমণ ।

আদি দেব আদি কবি মেলি জ্যোতির্ময় আঁখি
 চারিদিকে আছেন চাহিয়া,
 দেখিছেন স্তব্ধ ভাবে ভাব সম্ভানের খেলা,
 আনন্দে পূরিছে তাঁর প্রাণ !

* * * *

নূতন সে প্রাণের উল্লাসে,
 নূতন সে প্রাণের উচ্ছ্বাসে,
 বিশ্ব যবে হয়েছে উন্মাদ,
 চারিদিকে উঠিছে নিনাদ,

অনন্ত আকাশে দাঁড়াইয়া,
 চারিদিকে চারি হাত দিয়া,
 বিষ্ণু আসি মস্ত পড়ি দিলা,
 বিষ্ণু আসি কৈলা আশীর্বাদ !
 লইয়া মঙ্গল শঙ্খ করে,
 কাঁপায়ে জগত-চরাচরে
 বিষ্ণু আসি কৈলা শঙ্খনাদ !
 থেমে এল প্রচণ্ড কল্লোল,
 নিতে এল জ্বলন্ত উচ্ছ্বাস,
 গ্রহগণ নিজ অক্ষ-জলে
 নিভাইল নিজের ছতাস !
 জগতের বাঁধিল সমাজ,
 জগতের বাঁধিল সংসার,
 বিবাহে বাহুতে বাহু বাঁধি
 জগৎ হইল পরিবার ।

বিষ্ণু আসি মহাকাশে, লেখনী ধরিয়া করে
 মহান্ কালের পত্র খুলি,
 লইয়া ত্রিমূর্তি ভাব গুলি,
 একমনে পরম যতনে,
 লিখি লিখি যুগ যুগান্তর

বাঁধি দিলা ছন্দের বাঁধনে ।

জগতের মহা-বেদব্যাস,

গঠিলা নিখিল-উপন্যাস,

বিশৃঙ্খল বিশ্বগীতি লয়ে

মহাকাব্য করিলা রচন ।

জগতের ফুলরাশি লয়ে

গাঁথি মালা মনের মতন

নিজ গলে কৈলা আরোপন ।

জগতের মালা ধানি জগত-পতির গলে

মরি কিবা সেজেছে অতুল,

দেখিবারে হৃদয় আকুল ।

বিশ্ব-মালা অসীম অক্ষয়,

কত চন্দ্র কত সূর্য্য, কত গ্রহ কত তারা

কত বর্ষ, কত গীতময় ।

নিজ নিজ পরিবার লয়ে

ভ্রমে সবে নিজ নিজ পথে,

বিষ্ণু দেব চক্রে হাতে লয়ে,

চক্রে চক্রে বাঁধিলা জগতে ।

চক্র পথে ভ্রমে গ্রহ তারা,
 চক্র পথে রবি শশি ভ্রমে,
 শামনের গদা হস্তে লয়ে
 চরাচর রাখিলা নিয়মে ।
 তুরন্ত প্রেমেরে বাঁধি দিয়া
 বিবাহে করিলা পরিণত ।
 মহাকাশ শনিরে ঘেরিয়া,
 হাতে হাতে ধরিয়া ধরিয়া,
 নাচিতে লাগিল এক তালে
 সুধামুখী চাঁদ শত শত ।
 পৃথিবীর সমুদ্র-হৃদয়
 চন্দ্রে হেরি উঠে উথলিয়া,
 পৃথিবীর মুখপানে চেয়ে
 চন্দ্র হানে আনন্দে গলিয়া ।
 মিলি যত গ্রহ ভাই বোন,
 এক অঙ্গে হইল পালিত,
 তারা-নহোদর যত ছিল
 এক সাথে হইল মিলিত ।
 কত কত শত বর্ষ ধরি,
 দূর পথ অতিক্রম করি,

তারা গুলি, আলোকের দূত
 পাঠাইছে বিদেশ হইতে,
 ক্ষুদ্র ওই দূর দেশবাসী
 পৃথিবীর বারতা লইতে ।
 রবি ধায় রবির চৌদিকে,
 গ্রহ ধায় রবিরে ঘেরিয়া,
 চাঁদ হাসে গ্রহ মূখ চেয়ে
 তারা হাসে তারায় হেরিয়া ।
 মহাছন্দ মহা অনুপ্রাস
 চরাচরে বিস্তারিল পাশ ।

১ | ২
 পশিয়া মানস-সরোবরে,
 স্বর্ণ-পদ্ম করিলা চয়ন ।
 বিষ্ণু দেব প্রসন্ন আননে
 পদ্মপানে মেলিল নয়ন ।
 কুটিয়া উঠিল শতদল,
 বাহিরিল কিরণ বিমল,
 মাতিলরে দুলোক ভুলোক
 আকাশে পুরিল পরিমল ।

চরাচরে উঠাইয়া গান,
 চরাচরে জাগাইয়া হাসি,
 কোমল কমল দল হতে
 উঠিল অতুল রূপ রাশি।
 যেলি দুটি নয়ন বিহ্বল,
 ত্যজিয়া সে শতদল দল
 ধীরে ধীরে জগত-মাঝারে
 লক্ষ্মী আসি ফেলিলা চরণ,
 এহে এহে তারায় তারায়
 ফুটিল রে বিচিত্র বরণ।
 জগত মুখের পানে চায়
 জগত পাগল হয়ে যায়,
 নাচিতে লাগিল চারিদিকে,
 আনন্দের অন্ত নাহি পায়।
 জগতের মুখ পানে চেয়ে
 লক্ষ্মী যবে হাসিলেন হাসি,
 মেঘেতে ফুটিল ইন্দ্রধনু,
 কাননে ফুটিল ফুল-রাশি;
 হাসি লয়ে করে কাড়াকাড়ি
 চন্দ্র সূর্য্য-গ্রহ চারি ভিতে।

চাহে তাঁর চরণ-ছায়ায়
 যৌবন কুসুম ফুটাইতে ।
 জগতের হৃদয়ের আশা,
 দশদিকে আকুল হইয়া
 কুল হয়ে, পরিমল হ'য়ে
 গান হয়ে উঠিল ফুটিয়া ।
 এ কি হেরি যৌবন-উজ্জ্বল
 এ কিরে 'মোহন ইন্দ্রজাল,
 মৌন্দর্য্য-কুসুমে গেল ঢেকে
 জগতের কঠিন কঙ্কাল ।
 হাসি হয়ে ভাঙিল আকাশে
 তারকার রক্তিম নয়ান,
 জগতের হর্ষ-কোলাহল
 রাগিণীতে হল অবসান ।
 কোমলে কঠিন লুকাইল,
 শক্তিরে ঢাকিল রূপ রাশি,
 প্রেমের হৃদয়ে মহা বল,
 অশনির মুখে দিল হাসি ।
 নকলি হইল মনোহর
 সাজিল জগত-চরাচর ।

* * * *

মহাছন্দে বাঁধা হয়ে, যুগ যুগ যুগ-যুগান্তর,
 পাড়িল নিয়ম-পাঠশালে
 অসীম জগত-চরাচর ।
 শ্রান্ত হয়ে এল কলেবর,
 নিদ্রা আসে নয়নে তাহার,
 আকর্ষণ হতেছে শিথিল,
 উত্তাপ হতেছে একাকার ।
 জগতের প্রাণ হতে
 উঠিল রে বিলাপ-সঙ্গীত,
 কাঁদিয়া উঠিল চারি ভিত,
 পূর্বে বিলাপ উঠে, পশ্চিমে বিলাপ উঠে
 কাঁদিল রে উত্তর দক্ষিণ,
 কাঁদে গ্রহ, কাঁদে তারা, শ্রান্ত দেহে কাঁদে রবি,
 জগৎ হইল শান্তি হীন !
 চরিদিক হতে উঠিতেছে
 আকুল বিশ্বের কণ্ঠস্বর;—
 “জাগ’ জাগ’ জাগ’ মহাদেব,
 কবে মোরা পাব অবসর !—

অলংঘ্য নিয়ম-পথে ভ্রমি
 হয়েছে হে শ্রান্ত কলেবর ;
 নিয়মের পাঠ সমাপিয়া
 সাধ গেছে খেলা করিবারে,
 একবার ছেড়ে দাও দেব,
 অনন্ত এ আকাশ যাবারে ।”
 জগতের আত্মা কহে কাঁদি
 “আমারে নূতন দেহ দাও ;
 প্রতিদিন বাড়িছে হৃদয়,
 প্রতিদিন বাড়িতেছে আশা,
 প্রতিদিন টুটিতেছে দেহ,
 প্রতিদিন ভাঙিতেছে বল ।
 গাও দেব মরণ-সঙ্গীত
 পাব মোরা নূতন জীবন ।”
 জগৎ কাঁদিল উচ্চরবে
 আগিয়া উঠিল মহেশ্বর,
 তিনকাল ত্রিনয়ন মেলি
 হেরিলেন দিক্ দিগন্তর ।
 প্রলয় পিনাক তুলি করে ধরিলেন শূলী,
 পদতলে জগত চাপিয়া,

জগতের আদি অন্ত থর থর থর থর

একবার উঠিল কাঁপিয়া।

পিলাকেতে পুরিলা নিশ্বাস,

ছিঁড়িয়া পড়িয়া গেল,

জগতের সমস্ত বাঁধন।

উঠিল রে মহাশূন্যে গরজিয়া তরঙ্গিয়া।

ছন্দোমুক্ত জগতের উন্মত্ত আনন্দ কোলাহল।

ছিঁড়ে গেল রবি শশি গ্রহ তারা ধূমকেতু,

কে কোথায় ছুটে গেল,

ভেঙ্গে গেল টুটে গেল,

চন্দ্রে সূর্যে গুড়াইয়া

চূর্ণ চূর্ণ হয়ে গেল।—

মহা অগ্নি জ্বলিল রে,—

আকাশের অনন্ত হৃদয়

অগ্নি—অগ্নি—শুধু অগ্নিময়।

মহা অগ্নি উঠিল জলিয়া

জগতের মহা চিতানল।

খণ্ড খণ্ড রবি শশি, চূর্ণ চূর্ণ গ্রহ তারা,

বিন্দু বিন্দু আঁধারের মত

বরষিছে চারিদিক হতে,

অনলের তেজোময় গ্রানে
নিমেষেতে যেতেছে মিশারে।
সৃজনের আরম্ভ সময়ে
আছিল অনাদি অঙ্ককার,
সৃজনের ধ্বংশ-যুগান্তরে
রহিল অসীম ছতাশন।

অনন্ত আকাশ গ্রানী অনল সমুদ্র মাঝে
মহাদেব মুদি ত্রিনয়ান
করিতে লাগিল। মহাধান।

কবি ।

(অল্পবাদিত)

ওই যেতেছেন কবি কাননের পথ দিয়া,
কড়ু বা অবাক, কড়ু ভকতি-বিহ্বল হিয়া,
নিজের প্রাণের মাঝে
একটি যে বীণা বাজে,
সে বীণা শুনিতেছেন হৃদয় মাঝারে গিয়া !
বনে যতগুলি ফুল আলো করি ছিল শাখা,
কারো কচি তনুখানি নীল বসনেতে ঢাকা,
কারো বা সোনার মুখ,
কেহ রাঙ্গা টুক টুক,
কারো বা শতেক রঙ যেন ময়ূরের পাখা,
কবিরে আসিতে দেখি হরষেতে হেলি ঢুলি
হাব ভাব করে কত রূপসী সে মেয়ে গুলি,
বলাবলি করে, আর ফিরিয়া ফিরিয়া চায়,
“প্রণয়ী মোদের ওই দেখলো চলিয়া যায় ।”

সে অরণ্যে বনম্পতি মহান, বিশাল-কায়া,
হেথায় জাগিছে আলো, হোথায় ঘুমায় ছায়া ।

কোথাও বা বৃদ্ধ বট—

মাথায় নিবিড় জট ;

ত্রিবলী-অঙ্কিত দেহ প্রকাণ্ড তমাল শাল ;

কোথা বা শ্মশির মত

অশথের গাছ যত

দাঁড়িয়ে রয়েছে মৌন ছড়িয়ে আঁধার ভাল ।

মহর্ষি গুরুরে হেরি অমনি ভকতি ভরে

সসম্মুখে শিষ্যগণ যেমন প্রণাম করে,

তেমনি কবিরে দেখি গাছেরা দাঁড়াল নুয়ে,

লতা-শ্মশ্রুতায় মাথা ঝুলিয়া পড়িল ভুঁয়ে ।

এক দৃষ্টে চেয়ে দেখি প্রশান্ত সে মুখচ্ছবি,

চুপি চুপি কহে তারা “ওই সেই । ওই কবি ।”

Victor Hugo

বিসজ্জন ।

(অনুবাদিত)

যে তোরে বাসেরে ভাল, তারে ভাল বেসে বাছা,

চিরকাল সুখে তুই রোস্ ।

বিদায় । মোদের ঘরে রতন আছিলি তুই,

এখন তাহারি তুই হোস্ ।

আমাদের আলীকাদ নিয়ে তুই যা রে

এক পরিবার হতে অন্য পরিবারে ।

সুখ শান্তি নিয়ে যাস্ তোর পাছে পাছে,

দুঃখ জ্বালা রেখে যাস্ আমাদের কাছে ।

হেথা রাখিতেছি ধোরে সেথা চাহিতেছে তোরে,

দেবী হ'ল, যা' তাদের কাছে ।

প্রাণের বাছাটি মোর, লক্ষ্মীর প্রতিমা তুই,

তুইটি কর্তব্য তোর আছে ।

একটু বিলাপ যাস্ আমাদের দিয়ে,

তাহাদের তরে আশু যাস্ সাথে নিয়ে ;

এক বিন্দু অশ্রু দিস্ আমাদের তরে,

হাসিটি লইয়া যাস্ তাহাদের ঘরে ।

Victor Hugo.

তারা ও আঁখি ।

(অনুবাদিত)

কাল সন্ধ্যাকালে ধীরে সন্ধ্যার বাতাস
বহিয়া আনিতোছিল ফুলের সুবাস ।
রাত্রি হ'ল, আঁধারের ঘনীভূত ছায়ে
পাখীগুলি একে একে পড়িল ঘুমায়ে ।
প্রফুল্ল বসন্ত ছিল ঘেরি চারিদ্বার
আছিল প্রফুল্লতর যৌবন তোমার,
তারকা হাসিতেছিল আকাশের মেয়ে,
ও আঁখি হাসিতেছিল তাহাদের চেয়ে ।
দুজনে কহিতেছিযু কথা কানে কানে,
হৃদয় গাহিতেছিল মিষ্টতম তানে ।
রজনী দেখিনু অতি পবিত্র বিমল,
ও মুখ দেখিনু অতি সুন্দর উজ্জ্বল,
সোনার তারকাদের ডেকে ধীরে ধীরে,
কহিনু “সমস্ত স্বর্গ ঢাল এর শিরে !”
বলিনু আঁখিরে তব “ওগো আঁখি-তারা,
ঢালগো আমার পরে প্রণয়ের ধারা ।”

Victor Hugo.

সূর্য ও ফুল ।

(অনুবাদিত)

মহীয়সী মহিমার আগ্নেয় কুসুম
 সূর্য্য, ধায় লভিবারে বিশ্বামের ঘুম ।
 ভাস্সা এক ভিত্তি পরে ফুল গুল্লবাস,
 চারিদিকে গুল্লদল করিয়া বিকাশ
 মাথা তুলে চেয়ে দেখে সুনীল বিমানে
 অমর আলোকময় তপনের পানে,
 ছোট মাথা দুলাইয়া কহে ফুল গাছে—
 “লাবণ্য-কিরণ ছটা আমারো ত আছে।”

Victor Hugo.

সম্মিলন ।

(অনুবাদিত)

সেথায় কপোত-বধু লতার আড়ালে
দিবানিশি গাহে শুধু প্রেমের বিনাপ ।
নবীন চাঁদের করে একটি হরিণী
আমাদের গৃহদ্বারে আরামে ঘুমায় ।
তার শান্ত নিদ্রাকালে নিশ্বাস পতনে
প্রহর গণিতে পারি স্তব্ধ রজনীর ।
সুখের আবাসে সেই কাটার' জীবন,
দুজনে উঠিব মোরা, দুজনে বসিব,
নীল আকাশের নীচে ভ্রমিব দুজনে,
বেড়াইব মাঠে মাঠে উঠিব পর্বতে
সুনীল আকাশ যেথা পড়েছে নামিয়া ।
অথবা দাঁড়াব মোরা সমুদ্রের তটে,
উপল-মণ্ডিত সেই স্নিগ্ধ উপকূল
তরঙ্গের চুম্বনেতে উচ্ছ্বাসে নাতিয়া
থর থর কাঁপে আর জ্বল' জ্বল' জ্বলে ।
যত সুখ আছে সেথা আমাদের হবে,

আমরা দুজনে সেথা হব' দুজনের,
 অবশেষে বিজন সে দ্বীপের মাঝারে
 ভালবাসা, বেঁচে থাকা, এক হ'য়ে যাবে।
 মধ্যাহ্নে যাইব মোরা পর্বত গুহায়,
 সে প্রাচীন শৈল-গুহা স্নেহের আদরে
 অবসান রজনীর মুখ জোছনারে
 রেখেছে পাষণ কোলে ঘুম পাড়াইয়া।
 প্রচ্ছন্ন আঁধারে সেথা ঘুম আসি ধীরে
 হয়ত হরিবে তোর নয়নের আভা।
 সে দুম্ব অলস প্রেমে শিশিরের মত,
 সে ঘুম নিভায়ে রাখে চুম্বন-অনল
 আবার নুতন করি জ্বালাবার তরে।
 অথবা বিরলে সেথা কথা কব' মোরা,
 কহিতে কহিতে কথা, হৃদয়ের ভাব
 এমন মধুর স্বরে গাহিয়া উঠিবে
 আর আমাদের মুখে কথা ফুটিবে না।
 মনের সে ভাবগুলি কথায় মরিয়া
 আমাদের চোখে চোখে বাঁচিয়া উঠিবে।
 চোখের সে কথাগুলি বাক্য হীন মনে
 ঢালিবে অজস্র স্রোতে নীরব সঙ্গীত

মিলিবেক চৌদিকের নীরবতা সনে ।
 মিশিবেক আমাদের নিশ্বাসে নিশ্বাসে ।
 আমাদের দুই হৃদি নাচিতে থাকিবে,
 শোণিত বহিবে বেগে দৌহার শিরায় ।
 মোদের অধর দুটি কথা ভুলি গিয়া
 ক'বে শুধু উচ্ছ্বসিত চুহনের ভাষা !
 দু জনে দু জন আর রব'না আমরা,
 এক হোয়ে যাব মোরা দুইটি শরীরে ।
 দুইটি শরীর ? আহা তাও কেন হ'ল ?
 যেমন দুইটি উল্কা জ্বলন্ত শরীর,
 ক্রমশঃ দেহের শিখা করিয়া বিস্তার
 স্পর্শ করে, মিশে যায়, এক দেহ ধরে,
 চিরকাল জ্বলে তবু ভস্ম নাহি হয়,
 দুজনেই গ্রাস করি দৌহে বেঁচে থাকে ;
 মোদের যমক-হৃদে একই বাসনা,
 দণ্ডে দণ্ডে পলে পলে বাড়িয়া বাড়িয়া,
 তেমনি মিলিয়া যাবে অনন্ত মিলনে ।
 এক আশা রবে শুধু দুইটি ইচ্ছার
 এক ইচ্ছা রবে শুধু দুইটি হৃদয়ে,
 একই জীবন আর একই মরণ,

একই স্বরগ আর একই নরক,
 এক অমরতা কিন্নর একই নির্ঝাণ !
 হায় হায় একি হ'ল একি হ'ল মোর !
 আমার হৃদয় চায় উধাও উড়িয়া
 প্রেমের স্বদূর রাজ্যে করিতে ভ্রমণ,
 কিন্তু গুরুভার এই মরতের ভাষা
 চরণে বেঁধেছে তার লোহার শৃঙ্খল ।
 নামি বুকি, পাড়ি বুকি, মরি বুকি মরি ।

Shelley.

শ্রোত ।

জগত-শ্রোতে ভেসে চল',
যে যেথা আছ ভাই ।
চলেছে যেথা রবি শশি
চলরে সেথা যাই ।
কোথায় চলে কে জানে তা'
কোথায় যাবে শেষে ।
জগত-শ্রোত বহে গিয়ে
কোন সাগরে মেশে ।
অনাদি কাল চলে শ্রোত
অসীম আকাশেতে,
উঠেছে মহা কলরব
অসীমে যেতে যেতে ।
উঠিছে ঢেউ, পড়ে ঢেউ,
গণিবে কেবা কত ।
ভাসিছে শত গ্রহ তারা,
ডুবিছে শত শত ।
ঢেউয়ের পরে খেলা করে
আলোকে আঁধারেতে,

জলের কোলে লুকাচুরি
 জীবনে মরণেতে ।
 শতেক কোটি গ্রহতার
 যে স্রোতে তৃণ প্রায়,
 সে স্রোত মাঝে অবহেলে
 চালিয়া দিব কায় ।
 অসীম কাল ভেসে যাব'
 অসীম আকাশেতে,
 জগত কল-কলরব
 শুনিব কান পেতে ।
 দেখিব ঢেউ, উঠে ঢেউ,
 দেখিব মিশে যায় ।
 জীবন-ঝাবে উঠে ঢেউ
 মরণ গান গায় ।
 দেখিব চেয়ে চারিদিকে,
 দেখিব তুলে মুখ,
 কতনা আশা, কত হাসি,
 কতনা সুখ দুখ,
 বিরাগ ঘেষ ভালবাসা,
 কত না হায়-হায়,

তপন ভাসে, তারা ভাসে

তা'রাও ভেসে যায় !

কতনা যায়, কত চায়,

কত না কাঁদে হাসে,

আমিত শুধু ভেসে যাব

দেখির চারি পাশে !

অবোধ ওরে, কেন মিছে

করিস্ আমি, আমি !

উজানে যেতে পারিবি কি

সাগর-পথ-গামি !

জগত-পানে যাবিনেরে,

আপনা পানে যাবি,

সে যে রে মহা মরুভূমি

কি জানি কি যে পারি !

মাথায় কোরে আপনারে,

সুখ দুখের বোঝা,

ভাসিতে চাস্ প্রতিকূলে

সে তরে নহে সোজা !

অবশ দেহ, ক্ষীণ বল,
 সবনে বহে শ্বাস !
 লইয়া তোর স্মৃতি দুখ
 এখনি পাবি নাশ !

জগত হয়ে রব আমি
 একেলা রহিব না ।
 মরিয়া যাব একা হলে
 একটি জল কণা ।
 আমার নাহি স্মৃতি দুখ
 পরের পানে চাই,
 যাহার পানে চেয়ে দেখি
 তাহাই হ'য়ে যাই ।
 তপন ভাসে, তারা ভাসে,
 আমিও যাই ভেসে,
 তাদের গানে আমার গান,
 যেতেছি এক দেশে ।
 প্রভাত সাথে গাহি গান
 সন্ধ্যার সাথে গাই,

তারার সাথে উঠি আমি
 তারার সাথে যাই ।
 ফুলের সাথে ফুটি আমি,
 নতার সাথে নাচি,
 বায়ুর সাথে ঘুরি শুধু
 ফুলের কাছাকাছি ।
 মায়ের প্রাণে স্নেহ হয়ে
 শিশুর পানে ধাই,
 দুখীর সাথে কাঁদি আমি
 সুখীর সাথে গাই ।
 সবার সাথে আছি আমি
 আমার সাথে নাই,
 জগত-স্রোতে দিবানিশি
 ভাসিয়া চলে যাই ।

শরতে প্রকৃতি ।

কই গো প্রকৃতি রাণী, দেখি দেখি মুখ খানি,
কেন গো বিষাদ ছায়া রয়েছে অধর ছুঁয়ে ?

মুখানি মলিন কেন গো ?

এই যে মুহূর্ত্ত আগে হাসিতে ছিলে গো দেখি
পলক না পালটিতে সহসা নেহারি একি—

মরমে বিলীন যেন গো !

কেন তনু খানি ঢাকা, শুভ্র কুহেলিকা বাসে
মুদু বিষাদের ভারে স্তম্ভীরে মুদিয়া আসে
নয়ন-নলিন হেন গো ?

ওই দেখ চেয়ে দেখ—একবার চেয়ে দেখ—

চাঁদের অধর দুটি হাসিতে ভাসিয়া যায় ।

নিশীথের প্রাণে গিয়া সে হাসি মিশিয়া যায় ।

সে হাসির কোলে বসি কানন গোলাপগুলি

আধ' আধ' কথা কহে সোহাগেতে তুলি তুলি ।

সে হাসির পায়ে পড়ি নদীর লহরীগণ .

যার যত কথা আছে বলিতে আকুল মন ।

সে হাসির শিশু দুটি লতিকা মণ্ডপে গিয়া

আঁধারে ভাবিয়া সারা বাহিরিবে কোথা দিয়া ।

সে হাসি অলসে ঢলি দিগন্তে পড়িয়া নুয়ে,

মেঘের অধর প্রাপ্ত একটু রয়েছে ছুঁয়ে ।

বল তুমি কেন তবে,

এমন মলিন রবে ?

বিষাদ স্বপন দেখে হাসির কোলেতে শুয়ে ।

ঘোমটাটি খোল' খোল'

মুখ খানি তোল' তোল'

চাঁদের মুখের পানে চাও এক বার ।

বল দেখি কারে হেরি এত হাসি তার ।

নিলাজ বসন্ত যবে কুসুমে কুসুম ময়—

যাতিয়া নিজের রূপে হাসিয়া আকুল হয়,

মলয় মরমে মরি,

ফিরে হাহাকার করি—

বনের হৃদয় হোতে সৌরভ-উচ্ছ্বাস বয় ।

তারে হেরি হয় না সে এমন হরষে ভোর;

কি চোখে দেখেছে চাঁদ ওই মুখ খানি তোর ।

তুই তবু কেন কেন

দারুণ বিরাগে যেন

চামনে চাঁদের হাসি চাঁদের আদর ।

নাই তোর ফুল বাস,
নাইক প্রেমের হাস,
পাপিয়া আড়ালে বসি শুনায় না প্রেম গান !
কি দুখেতে উদাসিনী
যৌবনেতে সন্যাসিনী !
কাহার ধোয়ানে যথ গুহ্র বস্ত্র পরিধান ?

এক কালে ছিল তোর কুসুমিত মধু মাস—
হৃদয়ে ফুটিত তোর অজস্র ফুলের রাশ ;—
যৌবন উচ্ছ্বাসে তোর
প্রাণের স্মরণি তোর
পথিক সমীরে সব দিলি তুই বিলাইয়া !
শেষে গ্রীষ্ম তাপে জ্বলি
শুকাইল ফুল কলি,

সর্ব্বস্ব বাহারে দিলি মেও গেল পলাইয়া !
চেতনা পাইয়া শেষে হইয়া সর্ব্বস্ব-হারা
সারাটি বরষা তুই কাঁদিয়া হইলি মারা !
এত দিন পরে বুঝি শুকাইল অশ্রুধারা !
আজ বুঝি মনে মনে করিলি দারুণ পণ
যোগিনী হইবি তুই পাষাণে বাঁধিবি মন !

বসন্তের ছেলেখেলা ভাল নাহি লাগে আর —

চপল চঞ্চল হাসি কুলময় অলঙ্কার !

এখন যে হাসি হাস' আজি বিরাগের দিন,

শুভ্র শান্ত সুবিমল বাসনা লালসা হীন ।

এত যে করিলি পূণ —

তবুওত ক্ষণে ক্ষণ

সে দিনের স্মৃতি-ছায়া হৃদয়ে বেড়ায় ভাসি ।

প্রশান্ত মুখের পরে

কুহেলিকা ছায়া পড়ে—

ভাবনার মেঘ উঠে সহসা আলোক নাশি—

মুহুর্তে কিসের লাগি

আবার উঠিস জাগি

আবার অধরে ফুটে সেই সে পুরাণো হাসি !

ঘুমায়ে পড়িস যবে বিহ্বল রজনী শেষে,

অতি মৃদু পা টিপিয়া উষা আসে হেসে হেসে,

অতিশয় সাবধানে দুইটি আঙুল দিয়া

কুয়াশা ঘোমটা তোর দেয় ধীরে সরাইয়া !

অমনি তরুণ রবি পাশে আসি মৃদুগতি

মুদিত নয়ন তোর চুমে ধীরে ধীরে অতি !

শিহরিয়া কাঁপি উঠি

মেলিস নয়ন দুটি

রাঙা হোয়ে ওঠে তোর কপোল-কুসুম-দল

শরমে আকুল ঝরে শিশির-নয়ন-জল !

সুদূর আলয় হোতে তাড়াতাড়ি খেলা ভুলি

মাঝে মাঝে ছুটে আসে তুদণ্ডের মেঘ গুলি ।

চমকি দাঁড়ায়ে থাকে, ওই মুখ পানে চায়,

কাঁদিয়া কাঁদিয়া শেষে কাঁদিয়া মরিয়া যায় !

কিসের বিরাগ এত, কি তপে আছিল ভোর !

এত কোরে সেধে সেধে

এত কোরে কেঁদে কেঁদে

যোগিনি, কিছুতে তবু ভাস্গিবে না পণ তোর ?

যোগিনী, কিছুতে কিরে ফিরিবে না মন তোর ?

—

চেয়ে থাক।।

মনেতে সাধ যে দিকে চাই
কেবলি চেয়ে রব !
দেখিব শুধু—দেখিব শুধু
কথাটি নাহি কব' !
পরাণে শুধু জাগিবে প্রেম,
নয়নে লাগে ঘোর !
জগতে যেন ডুবিয়া রব
হইয়া রব ভোর !

তটিনী যায়—বহিয়া যায়
কে জানে কোথা যায় ;
তীরেতে ব'সে রহিব চেয়ে
সারাটি দিন যায় !
সুদূর জলে ডুবিছে রবি
সোনার লেখা লিখি,
সাঁঝের আলো জলেতে শুয়ে
করিছে ঝিকিঝিকি !

সুধীর-স্রোতে তরণী-গুলি
 যেতেছে সারি সারি,
 বহিয়া যায়, ভাসিয়া যায়,
 কত না নর নারী !
 না জানি তারা কোথায় থাকে
 যেতেছে কোন্ দেশে ;
 সুদূর তীরে কোথায় গিয়ে
 থামিবে অবশেষে ।
 কত কি আশা গড়িছে ব'সে
 তাদের মনখানি,
 কত কি সুখ, কত কি দুখ
 কিছুই নাহি জানি ।

দেখিব পাখী আকাশে ওড়ে,
 সুদূরে উড়ে যায়,
 মিশায় য়ায় কিরণ মাঝে,
 আঁধার রেখা প্রায় ।
 ভাহারি সাথে সারাটি দিন
 উড়িবে গোর প্রাণ ;

নীরবে বসি তাহারি সাথে
 গাহিব তারি গান ।
 তাহারি মত মেঘের মাঝে
 বাঁধিতে চাহি বাসা,
 তাহারি মত চাঁদের কোলে
 গড়িতে চাহি আশা ।
 তাহারি মত আকাশে উঠে,
 ধরার পানে চেয়ে,
 ধরায় যারে এসেছি ফেলে
 ডাকিব গান গেয়ে ।
 তাহারি মত, তাহারি সাথে
 উষার দ্বারে গিয়ে,
 ঘুমের ঘোর ভাঙায়ে দিব
 উষারে জাগাইয়ে ।

পথের ধারে বসিয়া রব
 বিজন তরুছায়,
 সমুখ দিয়ে পাথক যত
 কত না আসে যায় ।

ধুলায় ব'সে আপন মনে
ছেলেরা খেলা করে
মুখেতে হাসি সখারা মিলে
যেতেছে ফিরে ঘরে !

পথের ধারে, ঘরের দ্বারে
বালিকা এক মেয়ে,
ছোট ভায়ের পাড়ায় ঘুম
কত কি গান গেয়ে !
তাহার পানে চাহিয়া থাকি
দিবস যায় চলে
স্নেহেতে ভরা করুণ আঁখি,
হৃদয় যায় গোলে !
এতটুকু সে পরাণটিতে
এতটা স্মধারামি !
কাছেতে তাই দাঁড়ায়ে তারে
দেখিতে ভালবাসি !

কোথা বা শিশু কাঁদছে পথে
মায়েরে ডাকি ডাকি,

আকুল হয়ে পথিক-মুখে
 চাহিছে থাকি থাকি ।
 কাতর স্বর শুনিতে পেয়ে
 জননী ছুটে আসে,
 মাগের বুক জড়িয়ে শিশু
 কাঁদিতে গিয়ে হাসে ।
 অবাক হয়ে তাহাই দেখি
 নিমেষ ভুলে গিয়ে,
 দুইটি ফোঁটা বাহিরে জল,
 দুইটি আঁখি দিয়ে ।

যায় রে সাধ জগত পানে
 কেবলি চেয়ে রই
 অবাক হয়ে, আপনা ভুলে,
 কথাটি নাহি কই ।

শীত ।

পাখী বলে আমি চলিলাম ;—
ফুল বলে, আমি ফুটিব না ;
মলয় কহিয়া গেল শুধু,
বনে বনে আমি ছুটিব না !
কিশলয় মাথাটী না তুলে
মরিয়া পড়িয়া গেল করি,
সায়াহ, ধুমল-ঘন বাস
টানি দিল মুখের উপরি ।
নিশীথিনী বাষ্পময় আঁখি
চোখেতে দেখিতে নাহি পায় ;
হিমালীর মৃত কোলে শুয়ে
জোছনা সে আড়ষ্টের প্রায় ।

পাখী কেন গেলগো চলিয়া ?
কেন ফুল কেন সে ফুটেনা ?
চপল মলয় সমীরণ
বনে বনে কেন সে ছুটেনা ?

শীতের হৃদয় গেছে চোলে,
 অসাড় হ'য়েছে তার মন,
 জিবলী-বলিত তার ভাল
 কঠোর জ্ঞানের নিকেতন ।
 প্রেম নাই, দয়া নাই তার,
 নীরস বৈরাগ্য শুধু আছে,
 ফুল তার ভাল নাহি লাগে,
 কবিতা নিরর্থ তার কাছে ।
 সে চায় বালক সমীরণ
 সজ্জমে দাঁড়ায়ে রবে দীন,
 জোছনার হাসি মুখ হ'তে
 হাসিরাশি হইবে বিলীন ।
 সে কাহারো সঙ্গ নাহি চায়,
 একেলা করিতে চায় বাস ।
 চায় সে একেলা বসি বসি
 ফেলিবেক শীতল নিশ্বাস ।
 জোছনার যৌবনের হাসি,
 ফুলের যৌবন-পরিমল,
 মলয়ের বাল্যখেলা যত,
 পল্লবের বাল্য কোলাহল,

সকলি সে মনে করে পাপ,
 মনে করে প্রকৃতির ভ্রম,
 ছবির মতন ব'সে থাকা
 সেই জানে জ্ঞানীর ধরম ।
 তাই পাখী বলে চলিলাম ;
 ফুল বলে আমি ফুটিব না ;
 মলয় कहিয়া গেল স্তম্ভ,
 বনে বনে আমি ছুটিব না ;
 আশা বলে, বসন্ত আসিবে;
 ফুল বলে, আমিও আমিও,
 পাখী বলে, আমিও গাহিব,
 চাঁদ বলে, আমিও হাসিব ।

বসন্তের নবীন হৃদয়
 নূতন উঠেছে আঁধি মেলে,
 যাহা দেখে তাই দেখে হামে,
 যাহা পায় তাই নিয়ে খেলে ।
 মনে তার শত আশা জাগে,
 কি যে চায় আপনি না বুঝে,

প্রাণ তার দশ দিকে ধায়
 প্রাণের মানুষ খুঁজে খুঁজে ।
 ফুল-শিশু দেখিলে পাতায়
 বসিয়া তুলায় তারে কোলে,
 যখনি চাঁদের মুখ দেখে
 তখনি হরষে যায় গোলে ।
 দখিনা বাতাস বহিলেই
 অমনি সে খুলে দেয় বুক,
 খোলা-মন ভোলা-মন তার
 মুখ দেখে দূরে যায় দুখ ।
 ফুল ফুটে তারো মুখ ফুটে ;
 পাখী গায় সেও গান গায় ;
 বাতাস বুকের কাছে এলে
 গলা ধ'রে তুজনে খেলায় ।
 প্রাণে হৃদয় তার ভরা,
 বড়ই করুণ তার মন,
 কেমন স্তম্ভীরে চুম' খায়
 ফুলগুলি বুঝায় যখন !
 অতি মৃদু কথাগুলি কয়,
 ফুলের মাথাটি লয়ে কোলে,

চুপি চুপি কি কহে কে জানে

কানেতে স্বপন দিবে বলে ?

তাই শুনি, বসন্ত আসিবে, | +

ফুল বলে, আমিও আসিব ;

পাখী বলে, আমিও গাহিব ;

চাঁদ বলে আমিও হাসিব ।

শীত তুমি হেথা কেন এলে ?

উত্তরে তোমার দেশ আছে,

পাখী সেথা নাহি গাহে গান,

ফুল সেথা নাহি ফুটে গাছে ।

সকলি তুষার-শরুময়,

সকলি আঁধার জনহীন,

সেথায় একেলা বসি বসি

জ্ঞানীগো কাটায়ে তব দিন ।

এষে হেথা কবিতার দেশ,

হেথা কেন তব আগমন,

হেথায় যে ফুল ফুটে গাছে,

হেথায় যে বহে সমীরণ,

হেথায় সকলি অনুরাগ —
হেথায় বৈরাগ্য কিছু নাই,
তুমিগো দারুণ জ্ঞানবান—
হেথায় তোমারে নাহি চাই !

সাধ ।

অরুণময়ী তরুণ উষা

জাগায়ে দিল গান ।

পূরব মেঘে কনক মুখী

বারেক শুধু মারিল উঁকি

অমনি যেন জগত ছেয়ে

বিকশি উঠে প্রাণ ।

কাহার হাসি বহিয়া এনে

করিলি সুধা দান ।

ফুলেরা সব চাহিয়া আছে

আকাশ-পানে মগন-মনা,

মুখেতে মৃদু বিমল হাসি

নয়নে দুটি শিশির কণা ।

আকাশ পারে কে যেন বসে,

তাহারে যেন দেখিতে পায়,

বাতাসে তুলে বাহুটি তুলে

মায়ের কোলে ঝাঁপিতে যায় ।

কি যেন দেখে, কি যেন শোনে,

কে যেন ডাকে, কে যেন গায়,

ফুলের স্বপ্ন, ফুলের হাসি
দেখিবি তোরা আয়রে আয় ।

আ-মরি মরি অমনি যদি
ফুলের মত চাহিতে পারি !
বিমল প্রাণে বিমল স্বখে,
বিমল প্রাতে, বিমল মুখে,
ফুলের মত অমনি যদি
বিমল হাসি হাসিতে পারি !

দুলিছে, মরি, হরষ-শ্রোতে,
অসীম স্নেহে আকাশ হতে
কে যেন তারে খেতেছে চুমো,
কোলেতে তারি পড়িছে লুটে !
কে যেন তারি নামটি ধোরে
ডাকিছে তারে সোহাগ কোরে
গুনিতে পেয়ে ঘুমের ঘোরে,
মুখটি ফুটে হাসিটি ফোটে,
শিশুর প্রাণে স্বথের মত
স্বাস টুকু জাগিয়া ওঠে !

আকাশ পানে চাহিয়া থাকে
না জানি তাহে কি সুখ পায় !
বলিতে যেন শেখেনি কিছু
কি যেন তবু বলিতে চায় !

আঁধার কোণে থাকিস্ তোরা,
জানিস কিরে কত সে সুখ,
আকাশ পানে চাহিলে পরে
আকাশ পানে তুলিলে মুখ !

সুদূর দূ—র, সুনীল নী—ল,
সুদূরে পাখী উড়িয়া যায় !

সুনীল দূরে ফুটিছে তারা
সুদূর হতে আসিছে বায় !

প্রভাত-করে করিরে স্নান,
ঘুমাই ফুল-বাসে,

পাখীর গান লাগে যেন
দেহের চারি পাশে !

বাতাস যেন প্রাণের সখা,
প্রবাসে ছিল, নতুন দেখা,

ছুটিয়া আসে বকের কাছে
 বারতা শুধাইতে ;
 চাহিয়া আছে আমার মুখে,
 কিরণময় আমারি স্রুথে
 আকাশ যেন আমারি তরে
 রয়েছে বুক পেতে ।
 মনেতে করি আমারি যেন
 আকাশ-ভরা প্রাণ,
 আমারি প্রাণ হাসিতে ছেয়ে
 জাগিছে উষা তরুণ-মেয়ে,
 করুণ আঁখি করিছে প্রাণে
 অরুণ-সুধা দান !
 আমারি বুকে প্রভাত বেনা,
 ফুলেরা মিলি করিছে খেলা,
 হেলিছে কত, ছলিছে কত,
 পুলকে ভরা মন,
 আমারি তোরা বালিকা মেয়ে
 আমারি স্নেহ ধন !
 আমারি মুখে চাহিয়া তোর
 “আঁখিটি ফুট ফুটি !”

আমারি বুকে আঁলয় পেয়ে
 হাসিয়া কুটিকুটি !
 কেনরে, বাছা, কেনরে হেন
 আকুল কিলিবিলা,
 কি কথা যেন জানাতে চাস,
 সবাই মিলি মিলি ।
 হেথায় আমি রহিব বসে,
 আজি সকাল-বেলা,
 নীরব হয়ে দেখিব চেয়ে
 ভাই বোনের খেলা !
 বুকের কাছে পড়িব চ'লে
 চাহিব ফিরে ফিরে,
 পরশি দেহে কোমল-দল
 স্নেহেতে চোখে আসিবে জল,
 শিশির সম তোদের পরে
 ঝরিবে ধীরে ধীরে !

হৃদয় যোর আকাশ মাঝে
 তারার মত উঠিতে চায়,

আপন স্রুখে ফুলের মত
 আকাশ পানে ফুটিতে চায় ।
 নিবিড় রাতে আকাশে উঠে
 চারিদিকে সে চাহিতে চায়,
 তারার মাঝে হারিয়ে গিয়ে
 আপন মনে গাহিতে চায় ।
 মেঘের মত হারিয়ে দিশা
 আকাশ মাঝে ভাসিতে চায় ;
 কোথায় যাবে কিনারা নাই,
 দিবস নিশি চলেছে তাই,
 বাতাস এসে লাগিছে গায়ে,
 জোছনা এসে পড়িছে পায়ে,
 উড়িয়া কাছে গাহিছে পাখী,
 মুদিয়া যেন এসেছে আঁখি,
 আকাশ মাঝে মাথাটি খুয়ে
 আরামে যেন ভাসিয়া যায়,
 হৃদয় মোর মেঘের মত
 আকাশ মাঝে ভাসিতে চায় ।
 ধরার পানে ঝেলিয়া আঁখি
 উষার মত হাসিতে চায়,

জগত মাঝে ফেলিতে পা
চরণ যেন উঠিছে না,
সরমে যেন হাসিছে হৃদু হাস,
হাসিটি যেন নামিল ভূঁয়ে,
জাগায়ে দিল ফুলেরে ছুঁয়ে
মালতী বধু হাসিয়া তারে
করিল পরিহাস !

মেঘেতে হাসি জড়ায়ে যায়,
বাতাসে হাসি গড়ায়ে যায়,
উষার হাসি, ফুলের হাসি
কানন মাঝে ছড়ায়ে যায় ।
হৃদয় মোর আকাশে উঠে
উষার মত হাসিতে চায় !

সমাপন ।

আজ আমি কথা কহিব না ।

আর আমি গান গাহিব না ।

হের আজি ভোর-বেলা এসেছেরে মেলি লোক,

ঘিরে আছে চারিদিকে

চেয়ে আছে অনিমিখে,

হেরে মোর হাসি-মুখ ভুলে গেছে দুখ শোক !

আজ আমি গান গাহিব না ।

সকাতরে গান গেয়ে

পথপানে চেয়ে চেয়ে,

এদের ডেকেছি দিবা-নিশি,

ভেবেছিছু মিছে আশা,

বোঝেনা আনার ভাষা,

বিলাপ মিলায় দিশি দিশি !

কাছে এরা আসিত না,

কোলে ব'সে হাসিত না,

ধরিতে চকিতে হত লীন ।

মরমেবাজিত ব্যথা,

সাধিলে না কহে কথা,

সাধিতে শিখিনি এত দিন ।

দিত দেখা মাঝে মাঝে,
 দূরে যেন বাঁশি বাজে,
 আভাস শুনিযু যেন হয় ।
 মেঘে কভু পড়ে রেখা,
 কুলে কভু দেয় দেখা,
 প্রাণে কভু ব'হে চলে যায় !

আজ তারা এসেছে কান্দে,
 এর চেয়ে শোভা কিবা আছে ।
 কেহ নাহি করে ডর, কেহ নাহি ভাবে পর,
 সবাই আনন্দে ভাল বাসে,
 আগ্রহে ঘিরেছে চারি পাশে ।

এসেছি তোর যত জনা,
 তোদের কাহিনী আজি শোনা !
 যার যত কথা আছে, খুলে বল মোর কাছে,
 আজ আমি কথা কহিব না !
 আয় তুই, কাছে আয়, তোরে মোর প্রাণ চায়,
 তোর কাছে শুধু ব'সে রই ।
 দেখি শুধু, কথা নাহি কই ।

ললিত পরশে তোর, পরাণে লাগিছে ঘোর,

চোখে তোর বাজে বেণু বীণা ।

তুই মোরে গান শুনাবি না !

জেগেছে নূতন প্রাণ বেগে নূতন মান,

ওই দেখ পোহানোর রাতি ।

আমারে বকেতে দৈনে, কহিছ আমি, আমি ঘেরে

নিখিলের খেয়াগার সাধী ।

চারিদিকে সৌরভ, চারিদিকে গীত-রব,

চারিদিকে সুখ আর হাসি,

চারি দিকে শিশুগুলি মুখে আঁচ আঁচ বুলি,

চারিদিকে স্নেহ প্রেম রাশি ।

আমারে ঘিরেছে কা'রা, স্বেতে করেছে সারা

জগতে হয়েছে হারা প্রাণের বাসনা,

আর আমি কথা কহিব না !

আর আমি গান গাহিব না !

সমাপ্ত ।

৫/৪/২৬